

LIGÁRADAN PÁBLO JOUN RÓMANA

Labúrrijañoun Páblo joun tílana ligílisi to Rómaboun

¹ Anája áu, Páblo, nabúrrijañoun gárada to jun, jugúya lánigu Búngiu ja aganoúbaña ubúругu Róma. Aban esériwiduti lun Jesucrístu áu, anúadira lumútina Búngiu lun lánibadina lan apóstolu, ába loúnajanina lun nasúbudiragüdüni ugánu luáguti Wasálbaragüle le aráanse láalíbei jaba güri-gia. ² Sabúdigüda lumúti Búngiu ugánu le lúmangiñé meja binárü jádaangiñe profétagu, bürúwati le jadímurejabei tídan Lerérun Búngiu. ³ Núbinti asálbaruni ligía woun lídaangiñe Wabúreme Jesucrístu. Güri-gia ubouáguna Jesucrístu, Búngiu méme gíne. Queisi güri-gia, jádaangiñeti méja lufámilian Urúei David Jesucrístu, ⁴ arufudúati luágu Liraú lan Búngiu láu luweírin miláguru le ladúgübei láu lásaaragüdüni Jesucrístu lídaangiñe ouweni. ⁵ Fuleísei lumútiwa Búngiu lídaangiñe Jesucrístu lun loúnajaniwa lídan líri lun wasúbudiragüdüni joun güri-gia luágu queisi Wasálbaragüle lídan sun fulásu, gayára lámuga jafíñerun luágu, adúga jameíme le lubeíbei. ⁶ Anjúnjein jagánagua güri-gia jagía, jugúya le únbei lagúara Búngiu lun lánigu jumá Jesucrístu.

⁷ Nabúrrijaña lubeíti jun, jugúya le aganoúbei ubúругu Róma, ja jínsiñebaña lun Búngiu, wa ligía jun lun jabágaridun ában ibágari derégeguañu júngua lun. Ibíja jumá abíniruni lúma darángilau lúmangiñe Wáguchi Búngiu lúma lúmangiñe Wabúreme Jesucrístu.

Busénti Páblo lídin Róma

⁸ Furúmiñeti cátei le nabúseerúbei jasúbudirun, luágu luweírín neteíngiruni Nubúngiute lídaangiñe Jesucrístu juágu, sun jugúya, lugúndun adímurejóuati luágu jafiñen luágu Jesucrístu lídan sun fulásu. ⁹ Áni Búngiu, le ún-bei nesériwida táu sun nanígi apúrichijei ugánu luáguti Liraú, geféenti luágu luweírín nayúmuragun juágu sún-wandan lídan nayúmuragun lun. ¹⁰ Amúriajatina lúma Búngiu súnwandan lun madísebei lan wéyu ligía lun gayáraabei lan nídin aríjaün, ánjein ligía lubeí lugúndaanbei. ¹¹ Lugúndun buséntina naríjiniün lun níderagunün lídan jafiñen, lúntima derégüdagú jumá, ¹² lun gíñe wíchugun gurásu wádaangua láu affíñeni le wawágubei.

¹³ Nidújeñu, buséntina jasúbudiruni luágu álugaadina lan nídin aríjaün sarágu weíyaasu, siñágili nídin. Álu-gaadina nídin lun níderagunün lídan jawáanserun lídan jeíbugun lúma Búngiu, queísi naríjini jawáanserun jíbiri affíñetiña lídan buri ámu fulásu. ¹⁴ Lúnti níderaguniña sun gürígia, dándu ja chülúguatiña queísi ja machúlaa-guntiña, dándu chu táu queísi ibídiougua táu. ¹⁵ Lueígiñe lubeíti noubadina, buséntina gíñe lun napúrichijani ugánu luáguti Wasálbaragüle jun, jugúya le aganoubei ubúругu Róma.

Lubáfu ugánu lánina asálbaruni

¹⁶ Úati nibúsigari nan láu ugánu luáguti Wasálbaragüle, lugúndun níjein lan lubáfu Búngiu lídan ugánu ligía lun lasálbaruniña sun ja affíñebaña luágu, juríu furúmiñe, larígiñe, ja mámabaña juríu. ¹⁷ Arúfuda lumúti ugánu ligía woun ída líña lan larícharaguagüdüniña Búngiu gürí-gia ligíbugiñe, lun gayáraabei lan lerésibiruniña queísi lánigu. luwúyeri igáburi ligía, láurügü lafíñerúniwa luágu, libijúa. Ítara líña taríñaguni Lerérun Búngiu. “Le

gürígia le richáguabei ligíbugiñe Búngiu láu lafíñerun luágu, libíjubei ibágari magúmuchaditi.”

Jadúnrun gürígia ligíbugiñe Búngiu

¹⁸ Aríja wamúti láburujan lanárime ligáñi Búngiu siéluigiñe jawágun sun gürígia ja wuríbabaña, jáma ja minébenejabubaña lun, ja mígirunbaña lun lasúbudirúniwa linárün Búngiu, lurúma jaríban. ¹⁹ Subúdi jamúti le gayáraabei lasúbudirúniwa luágu Búngiu buídu buídu lugúndun ligía guánarügü arúfuda láali joun, ²⁰ le marijínbei luágu Búngiu, gayáraati lasúbudirúniwa láu buri cátei le ladúgübei. Arijúaaali furáangu lúmagiñe lagúmeserun ubou luágu Búngiu lan ligía, luágu gíñe Súnti Gabáfu lan ligía lun súnwandan. Gadúnrunjaña lubeíti luágu jaríban, ²¹ lugúndun láu sun subúdi jamáni Búngiu ítara, míchugugiña inébesei lun queísi Búngiu, meteíngirun jameí. Queísi libídiouniga láu ligáburi jarítangun luágu Búngiu, féridi jamúti murúsun larúgounga luágu Búngiu lé meja jabíjibeí. ²² Láu sun aríñaga jamá luágu chu lan jáu, ibídiouguati jáu, ²³ lubáragiñe jájudurangun lun Búngiu le weírigubei, le mouwedadibeí, jájuduragarüga joun jayáwa gürígia ja goúwedaditiña, lúma gíñe joun jayáwa dunúru, jéwe jáma anímaalu ja gádürügua tugúdi.

²⁴ Ligía ígira láaña lubeí Búngiu láu luríban ayúmajani le gádaanbaliña, darí lún buri jadúgün cátei buri nibúsi-garídünati jámagua. ²⁵ Ítara líña ligáburi jabágaridun lugúndun maffíñerun jamá luágu inárüni luáguti Búngiu, jafíñera luágu iyéeni, jájuduragua láu inébesei lún buri cátei le ladúgübei Búngiu lubáragiñe jamúga jájudurangun lun Búngiu, le gadúnabei inébesei súnwandan. Ítaralá.

²⁶ Ligía ígira láaña lubeí Búngiu lun jadáangun cátei nibúsi-garídünati, ásta würíña adáagutiña cátei jáma

würíña jáledi lubáragiñe jamúga jagámaridun wügúri queísi lubúdubu. ²⁷ Ítara méme gíñe ígira jamáali wügúriña jayúsurun würíña lun jayúsuragun jóungua. Adáaguatiña wügúriña cátei buri nibúsigarídünati jámagua, ábati jasúfuriruni lafáyeirujaja jawíye jawoúgua.

²⁸ Queísiti mabúseerúnjaña lan jíchuguni lilúgaarun Búngiu lun, ígira láañati láu lagúbüri jasáminan, lun jadúgüni le moún lubei jadúgüni. ²⁹ Buin jáña láu sun luwúyeri maríchaü, salúfuri, wuríbani, meménijabuni, iyéreejabüni, gimúgäü, áfarajadi, lanígiwa wuríbu, ayéeraguní, íbíbuni, marásualugu. ³⁰ Adímurejatiña wuríba jawágu jíbiri gürígia, iyéreeguti Búngiu joun, minébenejabutiña, barúguatiña jóungua, pántatiña. Gachúgütiña lun jaságarun iséri buri cátei wuríbati, mabájüdün jamútiña jagúbürigu, ³¹ ibídiouguati jáu, magúnfulirun jamúti jerérun, mínsiñejabutiña ni ca un, úati ferúduna jamá, magúdemejaabutiña. ³² Subúdi jamúti le laríñagubei Búngiu buídu buídu, subúdi jamúti luágu ja lan adúgütí buri cátei le, lúnti lan jóúnwen lueígiñe. Láu sun líra, adúga méme jamúti, darí lun gúnda jamá dan l jasáminan, lun jadúgüni lee jaríjin ámu gürígia adúgei.

2

Agúseragüdáti Búngiu láu inárüni

¹ Ligía gadúnrun lubei le adímurejabei luágu le ladúgübei ámu, cáteiñein lan, lugúndun dan le ladímurejan luágu wuríbani le ladúgübei ámu, líchuguña guánarügü dúru luoúgua, lugúndun líbe méme gíñe cátei wuríbati ligía ladúgübei. ² Subúdi wamúti luágu láu lan inárüni lagúseragüda Búngiu dan le lasádiruniña ja adúgübalin buri cátei l jasáminan, lun jadúgüni lee.

³ Bugúyati le adímurejabei jawágu ja adügúbalin buri cátei wuríbati le, áni ligía méme gíñe badúgübei, ¿jarítaguatibu funági luágu beséfuruba lan lueí ligáñi Búngiu? ⁴ ¿Ódi mebéresentibu láu lareíni Búngiu le magúmuchadibei lúma lugúraasun, ibídiñounga bun luágu arúfuda láani Búngiu lareíni bun lun gayáraabei lan basáansiruni bigáburi, máma lun basígirun afígounja? ⁵ Derétu banígi, májatibu basáansiruni bigáburi. Ligía abúnja lubeí agánwoundagüda lafáyeija bifígoun lubáme luwéyuri lagúseragüdün Búngiu dánme liábin lun líchuguni lisíadin le richábei, ⁶ dánme le lafáyeiruni cáda ában según le ladúgübei. ⁷ Líchuguba ibágari magúmuchaditi joun ja áluajabalin uweíriguni, inébesei, lúma cátei lé buri magúmuchaditi yágüta siélu láu jadúgüni le buídubei súnwandan ya ubouágu. ⁸ Ánjaña sun gürígia ja magáambadibaña lun Búngiu, ja májabaña lun jafálaruni linárün Búngiu, jafálarai wuríbani, lafáyeirubaña Búngiu láu sun ligáñi. ⁹ Níjeinbei asúfuriruni lúma igárigu joun sun ja adügúbalin le wuríbabei, joun juríu furúmiñe, lúma gíñe joun ja mámabaña juríu. ¹⁰ Ánjeinti joun sun ja adügúbalin le buídubei, líchuguba Búngiu uweíriguni, inébesei, lúma darángilaü, juríu furúmiñe, lúma gíñe joun ja mámabaña juríu. ¹¹ Lugúndun ában lan lanúgüniña Búngiu sun gürígia. ¹² sun ja afígounjabaña masúbudirunga jameí lilúrudun Búngiu le ledéregerubei joun gürígia lídaangiñe Moisés, jagúserawagüdúba bougudin lueí lúrudu ligía, tídiba jawáni máfiougatin. Játi afígounjabaña láu sun subúdi jamáni lilúrudun Búngiu, jagúserawagüdúba láu lúrudu ligía, tídiba gíñe jawáni máfiougatin. ¹³ Lugúndun máma ja agáambarügúbalin lúrudu richáguabaña ligíbugiñe

Búngiu, anáti ja agúnfulirubalin. ¹⁴ Játi mámabaña juríu, ja ibídiñejabubaña lun lilúrudun Búngiu, gayáraagili jadúgüni le lubeíbei Búngiu láurügü laríñagun jarítangun guánarügü joun luágu le buídubei lúma le wuríbabei. ¹⁵ Láu jagáburí, arúfuda jamúti luágu níjein lan lilúrudun Búngiu bürúñu tídan janígi, arúfuda tumúti janígi líra, áni laríñagubei jarítangun joun ánjein gadúnrun jabeí lúmoun madúnrun jamá. ¹⁶ Luágume wéyu le lagúseragüdüniña Búngiu sun gürígia lídaangiñe Jesucrístu, larítaguba luágu sún buri cátei le, ladúga lagúseragüdübei gíñe ásta cátei lé buri arámudagúabei tídan wanígi. Ítara lúba según ugánu luáguti asálbaruni le napúrichijabei.

Juríu lúma lilúrudun Moisés

¹⁷ Ánjein bugúya le pántabei luágu juríu ban, luágu bárügüdün luágu lilúrudun Moisés lun basálbarun, luágu Búngiu lan le inárüniti Bubúngiutebei. ¹⁸ Subúdi bumúti lugúndan Búngiu, áni arúfudajati lilúrudun Moisés bun lun banúadajani cátei le buídutimaabei. ¹⁹ Jarítaguatibu búngua luágu gayára lan badúndejan maríjintiña lídoun úma buíti lúma luágu gayára lan bíchugun larúgounga joun ja eíbugubaña lídan lubúriga. ²⁰ Jarítaguatibu luágu gayára lan barúfudajan joun ibídiougua táu luágu Búngiu, lúma lun barúfuduni úma joun ja isérigiñabaña lídan jafíñen, queísi barítangun luágu ibíja báani sun subúdi lúma inárüni lídan lilúrudun Moisés. ²¹ Wel, ánjein lubeíti arúfudaja bubeí joun ámu, ¿cági uágu marúfudajan bubeí bun guánarügü? Ánjein apúrichija bubeí luágu lúnti lan míwerujoún lan, ¿cági uágu bíweruja? ²² Ánjein aríñaga bubeí luágu moún lumuti lan jagámaridúniwa jámari gürígia maríeitiña, ¿cámegi badúgei? Ánjein iyéreegu lubeí cátei lánina sándu bun, ¿cámegi bádaragua

búngua lídoun buri cátei jánina sándu láu bíwerujani tirísín jalígílisín? ²³ Pántatibu láu lilúrudun Búngiu, ába bíchugun minébesei lun Búngiu láu magúnfulirun báani. ²⁴ Tinárün Lerérun Búngiu dan le taríñagunbei. “Jídaangiñeti, jugúya juríu, jadímurejanbei ja mámabaña juríu wuríba luágu Búngiu.”

²⁵ Adúga jumúti jugúya juríu igáburi le circuncisión lé meja liseíni lidáradun Búngiu jáma lánigu. Buíti igáburi ligía ánjaün agúnfulira lúma líbiri lilúrudun Búngiu lé meja líchugubei joun lánigu lídaangiñe Moisés. Ánjein magúnfulirun jumá, manúgünti circuncisión ni cáta jun, queígubeirügü madúgúniwa lan. ²⁶ Gürígia ja mámabaña juríu, ánjein jadúga buri cátei le lubeíbei lilúrudun Búngiu, janügúba queísi lánigu Búngiu láu sun merésibirun jamáni circuncisión. ²⁷ Gürígia ja merésibirubalin circuncisión, ába jagúnfulirun lúma lilúrudun Búngiu, jarúfudunbei jidúnrun, jugúya le resíbi jumáalíbei circuncisión, ja magúnfulirunbalin Lerérun Búngiu, láu sun jun lan labúrüdúwa. ²⁸ Le juríubei le tímatimaati, máma bougudigiñerügü libíti juríu lan, máma gíñe láurügü wadúgün cátei le bouguditi wabíti lánigu wamá Búngiu. ²⁹ Láu wafálaruni Búngiu táu sun wanígi, lánigu wagía le tímatimaati, wáfaaguba táu sun wanígi lun wadúgüni lugúndan, lugúndun ni cáta circuncisión lun Búngiu. Ítara líña lubeíti, gürígia le lánigubei Búngiu tídaangiñe lanígi, ligía buídubei ligíbugiñe Búngiu íbini jarítangun gürígia luágu mabuídun lan.

3

¹ Queísi ítara líña lubeí, ¿jalíañeinti jagáñiragüle gürígia lueígiñe juríu jamá? ¿o cági lubuíduña lerésibirúniwa circuncisión? ² Sarágu, áni gíbeti gíñe lébuna. Furúmiñeti

cátei, rúlumuti Búngiu lerérun joun juríu. ³ Ánjaña ñi jádaangiñe juríu, múaraantiña lúma Búngiu, ¿magúnfulirunbei funági Búngiu láu lerérun ladúga líra? ⁴ ¡Máma líña! Lubáragiñe líra, lagúnfuliruba Búngiu láu lerérun láu sun yé jama sun gürígia uboúagu. Tariñajare Lerérun Búngiu.

Babájüdúba queísi richáti lídan le baríñagubei, áni buídubei báfuridun dánme le bagúserawagüdún.

⁵ Ábanya álügüdajani. ánjein seríwi lubeí luríban wagáburi lun larúfuduni luágu richágua lan Búngiu, ¿cábagi waríñaga? ¿Maríchatí funági Búngiu lugúndun larúfuduni ligáñi luágu luríban wagáburi? (Nadímurejañatia queísi gürígia.) ⁶ ¡Máma líña! Lugúndun lun jamúga múaran lan Búngiu, ¿ída líña jamúgagi lagúseragüdúniña gürígia?

⁷ Ánjein gíñe seríwi lubeí wayéeni lun weírigutimá lan linárün Búngiu, ¿cáti uágu laríñawagúa wawágu luágu gafígoun wamá? ⁸ ¿Lúnti lubeí jamúga ladügún wuríbani lun larijóuniwa le buídubei? Niján cátei le jaríñagubei sarágu gürígia luágu ligá lan warúfudajabei. Gürígia ja aríñagubaña ítara, lúnti jamúga jasiádirúniwa.

Sun wagía gadúnruntiwa ligíbugiñe Búngiu

⁹ ¿Ída liñági? ¿Buítimaatiwa wagía juríu sügú jáu gürígia ja mámabaña juríu? ¡Uá! Lugúndun arúfuda wamáali luágu dándu lan juríu queísi máma juríu lábugiñeñanu lubáfu figoú. ¹⁰ Tariñajare Lerérun Búngiu.

Úati ni ában gürígia richáguati ligíbugiñe Búngiu, ni íbini ábanrügü,

¹¹ úati ni ában ánjaruti lun gunfaráanda lan, úati ni ában áluajati Búngiu.

¹² Yuríguaaña súngebui, ñúdünjaña lídoun féridi.

Úati ni ában adúgüti le buídubei, ni íbini ában.

¹³ Eyéeraguatiña láu jayúma,

júnren líña jayúma lun jadímurejan lagúbüri dimúrei le mínsiñeguti

queísi limínsiñegun líjeme umúajaü júnren lárigiñe líchugúniwa jiláali ñíjin.

Yúsu jamúti jayúma lun jagádeirun jíri gürígia furése queísi láfarajan lupeísini jéwe.

¹⁴ Anábajani rügúñein jadímurejan lau jeyéreejabu.

¹⁵ Furéseti jagúdi lun jóudin áfaraja.

¹⁶ Barúti jagáburi gürínguaü lúma igárigu,

¹⁷ áni ibídiñeti úma lánina darángilaü joun.

¹⁸ Marítagungubeítiña luágu lanúfudewa lueí Búngiu.

¹⁹ Subúdi wamúti luágu sun lan le laríñagubei binádu lilúrudun Búngiu, joun lan ja lábugiñebaña lúrudu ligía laríñagei, lun jasúbudiruni gürígia jagía luágu gafígoun jamá. Ítara líña lubeíti, gadúnrun jamá sun gürígia ligíbugiñe Búngiu, dándu juríu queísi ja mámabaña juríu.

²⁰ Lugúndun úabei ni ában eréderuti richágu ligíbugiñe Búngiu lueígiñerügü ladúgüni le lubeíbei lúrudu, lúnrügü lasúbudiragüdüni lúrudu woun luágu gafígoun wamá lesériwida.

Lídaangiñe afíñeni líabin asálbaruni

²¹ Guetóti arúfuda láali Búngiu woun ída lúba lan ligáburi gayára lan weréderun richáguañu ligíbugiñe bougudin lueí lúrudu lé meja líchugubei lídaangiñe Moisés. Gayáraati wasúbudiruni líra láu walíjanun lilíburuna to meme lilúrudun Moisés, túma jalíburun profétagu. ²² Láu wafíñerun luágu Crístu, gayára lan weréderun richáguañu ligíbugiñe Búngiu, áni ában lan ladúgüni Búngiu líra joun sun gürígia, ²³ lugúndun afígounjaaña sun gürígia áni siñáti lagúndaarun Búngiu

jáu. ²⁴ Láu lareíni Búngiu, resíbi lumútiña sun gürí-gia queísi lánigu, mafáyeijaanga jagía luágu, lugúndun fáyeijali Crístu luágu wafígoun lun gayáraabei lan weréderun richáguañu ligíbugiñe Búngiu. ²⁵ Adúgati Búngiu lun lébunabei lan ferúdun Crístu láu loúnwen luágu wafígoun, áni lídaangiñe wafíñerun luágu queísi Wasálbaragüle liábin ferúdun woun. Láu loúnwen Crístu queísi afáyeiragülei luágu figou, ába larúfuduni Búngiu luágu úaragua lan áni iyéereguti figou lun. Ába lachíbuni líta Crístu jafígoun gürígia já meja aganoúbaña lídan dan le sügújalabei, le uágubei mafáyeijagüdüñ lánabaña lan, ²⁶ chibá lumuti gíñe jafígoun ja aganoúbaña lídan buri dan le, lun larúfuduni luágu úaragua lan, áni sun ja afíñebaña luágu Jesucrístu queísi Jasálbaragüle barú lumútiña queísi úaraguatiña.

²⁷ Queísiti ítara líña lubeí, ¿cáti asúseredubei lun japántan gürígia luágu lubuídun jagáburi? Gumúguati. ¿Cági uágu? Lugúndun lun jamúga gayára lan wasálbarun láu lubuídun wagúnfulirun luma binádu lilúrudun Búngiu, gayáraati jamúga wanáangun woúngua, queísi sálbañu wáña lubeí láurügü wafíñerun luágu Crístu, gumúgua lébuna wanáangun woúngua. ²⁸ Subúdi wamáali lubeíti buídu luágu resíbi láani Búngiu gürígia le afíñeti luágu Crístu queísi gürígia richáguati, mebéresegúnga ánjein gúnfulijali lubeí luma lilúrudun Moisés lúmoun magúnfulirungili lan.

²⁹ ¿Juríu rügúñanu funági Gabúngiutei Búngiu? ¿Ma funági gíñe Jabúngiute ja mámabaña juríu? Jabúngiute gíñe, ³⁰ lugúndun ában rügúñein Búngiu, le erésibirubaliña sun gürígia ja afíñebaña luágu Jesucrístu queísi Jasálbaragüle, mebéresenga ligía ánjein resíbi jabálin circuncisión lúmoun merésibirun jamáni. ³¹ ¿Wayúsuruñein

lubeíti affíñeni luágu Crístu lun warúfuduni luágu mebégi lan binádu lilúrudun Búngiu guetó? ¡Uá! Lubáragiñe líra, warúfuduñein luágu buídu méme lan lúrudu ligía.

4

Jémpulu luáguti Abrahám

¹ ¿Cábatí waríñaga luágu Abrahám, le binádu wáguchi, wagía juríu? ² Lun jamúga lueígiñe lan ladúgün cátei buíti lerésibirei Búngiu queísi ában gürígia richáguati, gébunati jamúga lapántajan, máma ligíbugiñe Búngiu. ³ Taríñajare Lerérun Búngiu. “Affíñetí meja Abrahám luágu Búngiu, luágu lafíñen lerésibirei queísi wügúri richáguati.” ⁴ Dan le ladúgün gürígia ában wadágimanu, fáyeiti le libíjubei lebégi luwádigimari, máma edéweejani. ⁵ Ánjeinti gürígia le asálbaruti lídaangiñe lifígoun láurügü lafíñerun luágu Búngiu le erésibirubaliña gafígountiña, lerésibirubei Búngiu queísi ában gürígia richáguati luágu lafíñen, anáti líra, edéweejani. ⁶ Davíd guánarügü adímurejati luágu jagúndan gürígia ja lerésibirubaña Búngiu queísi richáguatiña luágurügü jafíñen, mebéresenga ligía ca lán meja jadúgübei. ⁷ Laríñajare Davíd.

Gúndaatiña gürígia ja ferúduna lubáña Búngiu jaríban, áni chibáwa ligía jafígoun.

⁸ Gúndaati gürígia le lanúgübei Búngiu queísi gürígia mafígounjaangili.

⁹ ¿Jóunti rügüñein funásan ja erésibirubalin circuncisión, ódi jóunti gíñe ja merésibirunbalin? Jóunti sun jawúyeri gürígia ugúndani ligía. Aríñagaadiwa luágu resíbi láani Búngiu Abrahám queísi wügúri richáguati, luágu lafíñen. ¹⁰ ¿Ída bugági lerésibirei, lárigiñe lerésibiruni circuncisión ligía ódi lubáragiñe? Máma lárigiñe,

lubáragiñe. ¹¹ Lárigiñe larúfuduni Abrahám lafiñen luágu Búngiu, ligía lerésibiruni circuncisión queísi seíni luágu resíbi láali lan Búngiu queísi wügúri richáguati ladúga lafiñen luágu. Ítara líña gíñe liábin Abrahám lun jáguchibeí lan sun ja afiñebaña luágu Búngiu merésibirunga circuncisión, áni resíbi lumútiña gíñe Búngiu ítara queísi richáguatiña. ¹² Jáguchi gíñe ja resíbi jamáalibeí circuncisión Abrahám, ja afiñebaña luágu Búngiu queísi lafiñerun Abrahám lúmagiñe lubáragiñé meja lerésibiruni circuncisión.

Gúnfuliti Búngiu láu lerérun

¹³ Aríñagatí meja Búngiu lun Abrahám luágu líchugubei lan uboú lun jáu sun linébaanfaangu queísi jalágaante, máma ladúga lagúnfuliruni Abrahám lilúrudun Búngiu líchugúa dimúrei le lun, ladúga lafiñerun luágu Búngiu, ába lerésibiruni Búngiu queísi ában wügúri richáguati.

¹⁴ Lun jamúga já rügúñanu lan íchugubalin jeménigi luágu jagúnfulirun lúma lilúrudun Búngiu erésibira alágan, málati lubeítí jamúga jafiñerun ja eménigidubaña luágu jafiñen luágu Búngiu lun jerésibiruni. Málati jamúga gíñe dimúrei le líchugubei Búngiu luágu alágan lugúndun lídan linárün cátei, mabáfutiña gürígia lun jagúnfulirun lúma lilúrudun, ¹⁵ barúrügü lumúti lilúrudun Búngiu ligáñi jawágun gürígia luágu magúnfulirun jamáni. Ánjein le ñí lumuti úa lan lúrodu, úati gíñe dúru luágu ladúraawagún.

¹⁶ Ligía, lun lubeí derégüda lan dimúrei le líchugubei Búngiu lun Abrahám joun sun linébaanfaangu, lúnti méja ábanbei lan edéweejani luágurügüti afiñeni. Mámarügü jóunti ja lábugiñebaña lilúrudun Búngiu le líchugubei joun juríu lídaangiñe Moisés dimúrei ligía, jóunti gíñe sun ja mámabaña juríu áni máma gíñe lábugiñeñanu

lúrudu ligía, ába jafñerun luágu Búngiu queísi lafñerun Abrahám luágu. ¹⁷ Ligíbugiñe Búngiu, ñúbinti lubeíti Abrahám lun wáguchibei lan sun wagía le affñebei luágu Búngiu, queísi taríñagun Lerérun Búngiu. “Adúga náadibu lun jáguchi ban sarágu mútu.” Gabáfuti Búngiu lun ladúgüni líra queísi gabáfu lan lun líchugun ibágari joun jiláaña, níjeingüdaleí buri cátei le úagili.

¹⁸ Láu sun uá lán yebe eménigini luágu Abrahám lun garaú lan ladúga weíyaali lan, weíya tugúya Sára, affñeti dán meja le laríñagubei Búngiu lun luágu ítara lúba lan jíbe ladúgawagun queísi warúguma. Ába lasúseredun ítara lun jáguchibei lan sarágu mútu. ¹⁹ Meféridirun lumúti lafñen luágu dimúrei le laríñagubei Búngiu lun, láu sún meja yaráfaali lan lun lagúnfulirun san irúmu, áni weíyaaru gíñe Sára lun tagáraüdün. ²⁰ Maloúguadunti lafñen luágu dimúrei le laríñagubei Búngiu lun, weíritimáarügüti lafñen. ²¹ Rúti uweíriguni lun Búngiu láu ában ichouruni le tímatimaati luágu gabáfu lan Búngiu lun ladúgüni sun le uágubei laríñaga. ²² Ligía lerésibirunbalin Búngiu queísi wügúri richáguati, luágu lafñen.

²³ Cátei le, luáguti lerésibiruniña Búngiu gürígia luágu jafñen, mámarügü luágu Abrahám labúrújoúa, ²⁴ labúrújoúña gíñe wawágu. Lugúndun luágu wafñen, resíbi lumútiwa gíñe Búngiu queísi richáguatiña, wagía le affñebei luágu le ásaaragüdübalin Wabúreme Jesúsu lídaangiñe oúweni. ²⁵ Jesúsu le ederegerúabei lun loúnwen luágu wafígoun, ába lásaarun lídaangiñe oúweni lun larúfuduníwa richáguañu ligíbugiñe Búngiu.

5

Niján lébubei weréderun madúnrunga

¹ Queísiti resíbi láadiwa lubeí Búngiu láu waffínerun luágu, lídaanjadiwa dan lúma, lídaangiñe Wabúreme Jesucrístu. ² Ladúga Crístu, biníwadiwa lubeí láu waffínen luágu, derégüdagu wáña lídan lareíni Búngiu, áni gúndaatiwa láu eménigini luágu gafáanranbadiwa lan lídan luweírigun Búngiu. ³ Áni máma rügúñein líra, gúndaatiwa gíñe lídan wasúfurirun ya uboúagu, lugúndun subúdi wamúti luágu ru lan asúfuriruni gurásu woun, ⁴ buídugüda lumúti gurásu wagáburu, áni láu líra, gayára lan weménigidun lun gafánraanbadiwa lan lídan luweírigun Búngiu yágüta siélu. ⁵ Áni máburujanbei warúna lurúma eménigini le, ladúgübei Búngiu le aríñaga láalíbei woun ladúga línsiñejabu woun. Sandí wamaali línsiñejabu, buíngüda láaru wanígi láu línsiñejabu, láu Sífiri Sándu le rúlaalíbei woun.

⁶ Ladúga línsiñejabu Búngiu woun, queí meja le mabáfu wabeí lun wasálbaragun woúngua lídaangiñe figoú le gádaanbaliwa, ába loúnajani Crístu lídan óra le lanúadirubei lun loúnwen wawágu, wagía le gaffígounbei. ⁷ Máma cátei ménreengunti lun loúnwen ában gürígia jawágu ámu gürígia, ni íbini lueígiñe ában gürígia le buídubei, láu sun níjein lan gürígia gayáraati jamúga loúnwen lueígiñe ában gürígia le buíti le tímatimaati. ⁸ Ánjein Búngiu, ába larúfuduni luweírin línsiñejabu woun láu loúnajani Jesucrístu le Liraú lun loúnwen wawágu, láu sún meja gaffígoungidiwa lan. ⁹ Guetóti, láu resíbi láadiwa lan queísi gürígia richáguatiña láu loúnwen Crístu wawágu, choúrutimaati luágu weséfuruba lan lueí ligáñi Búngiu le lúnbei láburujan jawágun gaffígountiña lídaanme luwéyuri agúseruni. ¹⁰ Lugúndun ánjein ru lubáliwa Búngiu lídan dan lúmagua láu loúnwen Liraú dán meja le láganigídiwa, choúrutimaati luágu lasálbarubadiwa lan le gumúti, luágu

Liraú le wínwañubei lúma, siélu. ¹¹ Áni máma rügúñein cátei le, gúndaatiwa gíñe lúma Búngiu lídoun buri dan le, lídaangiñe Wabúreme Jesucrístu, le ídaangiñebei lídaan-jadiwa lan dan lúma Búngiu.

Adán lúma Crístu

¹² Ítara queísi lídaangiñe lán meja ábanrügü wügúri le gírubei Adán lebélura figoú uboúagun, ába lanúgüni figoú oúweni lúmagua queísi lafáyeija, ítara líña gíñe jóuweguba lubei sun gürígia lugúndun afígounjatiña sún-gubei. ¹³ Lubáragiñe meja líchuguni Búngiu lilúrudun joun gürígia lídaangiñe Moisés, añájeinjaña méja gürígia afígounjaña uboúagu, láu sun úagili lan lúrudu ligía lun gayáraabeí lan jadúraaguni. ¹⁴ Láu sun líra, lúmagiñe meja lidáni Abrahám darí lúmoun lidáni Moisés, jilátiña gürí-gia luágu jafígoun láu sun máma lan ladúga magáambadi jamá jafígounbei queísi ladúgüni Adán le magáambadibeí lun lerérun Búngiu lun. Lueígiñe ában oúbaü, Adán liyáwa Crístu le lúnbei liábin, ladúga biángubei jagía barútiña som cátei joun gürígia.

¹⁵ ¡Ámuñegueinarügü gíñe cátei le janúgübei joun gürí-gia! Barúti Adán oúweni joun sun gürígia láu lafígounjan, ánjeinti Crístu, barúti asálbaruni joun sun gürígia, áni weíríti asálbaruni le líchugubei Búngiu láu lareíni woun lídaangiñe Crístu sügú láu lifígoun Adán. ¹⁶ Weíríti gíñe le líchugubei asálbaruni sügú láu le líchugubei lifígoun Adán woun. Ladúgarügü ában figoú, chülúti oúweni joun sun gürígia, ánjeinti ladúga loúnwen Crístu wawágu, ferú-dunawati sun wafígoun le gíbebei, resíbi lumútiwa Búngiu queísi gürígia richáguatiña. ¹⁷ Ánjein gabáfu lubei oúweni jawágu sun gürígia ladúga lidúnrun ábanrügü wügúri

—Adán, choúrutimaati luágu sun lan gürígia ja lerési-birubaña Búngiu láu lareíni queísi gürígia richáguatiña, jabíjubei ibágari magúmuchaditi lúma Búngiu, jarúejaba úara lúma Crístu, ladúga ábanrügü wügüri ligía.

¹⁸ Ítara queísi líchuguniña Adán sun gürígia lábugiñe lisíadin Búngiu lun jounwen láu ladúgüni le áubei magúndan lan, ítara líña gíñe lagídaruniña Crístu gürígia lábugiñegiñe asíadiruni ligía, rúlei ibágari magúmuchaditi joun láu ladúgüni lugúndan Búngiu lun loúnwen jawágu. ¹⁹ Ladúga lubeíti lumágaambadi ábanrügü wügüri, ñúbintiña sun gürígia lun jaffigounjaba lan, ítara méme gíñe, ladúga lagáambadi ábanrügü wügüri, gayáraati jayábin sun gürígia lun richágua jamá ligíbugiñe Búngiu.

²⁰ Rúati lilúrudun Moisés woun lun gayáraabei lan wasúbudiruni cátei lan figóubei. Láu sun gíbe lan figóu ubouágu, weíritimaabei lareíni Búngiu lun lachíbuni sun figóu ligía. ²¹ Ítarati queísi gabáfu lán meja figóu lun lanúgüni ouweni, ítara gíñe gabáfuti lareíni Búngiu lun ladúgüniña gürígia richágua ligíbugiñe, lúma lun líchugun ibágari magúmuchaditi joun lídaangiñe Wabúreme Jesucrístu.

6

Jiláñu wáña lun figóu, wínwañu lun wesériwidun lun Crístu

¹ ¿Cábatí waríñaga? ¿Wasígiruba afígounja lun larúfuduntima Búngiu lídaangiñe lareíni woun? ² ¡Máma lúba! Wagía, jiláadiwa lun figóu, ¿ída lubáti gayára lan wasígirun afígounja? ³ ¿Ibídíñeti jun luágu láu lan lídan wamá ában lúma Crístu láu wabásterun, queísigubeirügü jamúga lídaañadiwa lan gíñe ában lúma lídan loúnwen,

lun mabáfujali lánme figoú wawágu? ⁴ Láu wabásterun, queísigubeirügü jamúga bunáwa wamá úara lúma Crístu, áni reideitiwa jiláñu lun figoú. Queígubeirügü sarágüda láani Wáguchi Búngiu Crístu lídaangiñe oúweni láu luweírin lubáfu, sarágüda láadiwa gíñe lun isérijali lan wabágari.

⁵ Lugúndun ánjein ñúbin wabeí lun lídaanbadiwa lan ában lúma Crístu lídan ában oúweni líbe loúnwen, ítara wába gíñe lídan lásaarun lídaangiñe oúweni. ⁶ Subúdi wamúti luágu dáwagua lan binádu meja wagáburi lúma Crístu luágu gurúwa lun lagúnrinchawagún lubáfu figoú lé meja wawágubei, lun merédeediwa lan queísi idámuni esériwida lun figoú queísi wayúbudiri. ⁷ Lugúndun le jilálalibei, furíjali lídaangiñe figoú. ⁸ Ánjein jiláadiwa lubeí lúma Crístu, gayáraati wafíñerun luágu wabágariduba lan gíñe lúma, ⁹ lugúndun subúdi wamúti luágu sará lan Crístu ában weíyaasu lídaangiñe oúweni, moúnwendügúyaali, mabáfujali oúweni luágu. ¹⁰ Dan le loúnwenbei Crístu, ába lagúmuchaguagüdüni lubáfu figoú lun sun dan, áni ibágari le labágaridubei guetó, lun méme lesériwidun lun Búngiu labágaridei. ¹¹ Jugúya gíñe, rúgua jumá júngua queísi jiláguaaña lun figoú, áni wínwañu lun jesériwidun lun Búngiu, lídan ában lúma Crístu Jesúsú le Wabúreme.

¹² Ligía, mígira jumá lubeí lun gabáfu méme lan figoú juágu, afósuraün lun jadúgüni luríban jayúmajan. ¹³ Míchaagua jumá júngua lun figoú lun layúsuruni júgubu lun cátei wuríbati. Lubáragiñe líra, derégegua jumá júngua lun Búngiu queísi gürígia jiláaña, ábaya jabágaridun, derége jumeí júgubu lun Búngiu lun layúsuruni lun cátei buíti. ¹⁴ Mabáfujalíme figoú juágu, lugúndun mámaadün lábugiñe lilúrudun Búngiu, lábugiñejadün lareíni lun

gayára lan jadúgüni lugúndan.

Ában jémpulu luágu idámuni

¹⁵ Queísiti máma lubeí lídaangiñe wagúnfulirun lúma lilúrudun Búngiu le líchugubei lun Moisés liábin wasál-barun, lídaangiñe werésibiruni lareíni Búngiu, ¿gayáraati lubeíti wabágaridun lídan figoú ladúga líra? ¡Siñáti! ¹⁶ ¿Ibídíñeti jun luágu le lan únti jíchaagua júngua lun jídin láu le lubeíbei lidámuñadün lan? Gayáraati lubeíti janúadajan cába lan un jíchaagua júngua, lún yebe figoú le íchugubei féridi, o lun lan agáambadi lun Búngiu, le íchugubei ában ibágari richáguati. ¹⁷ Teínqui níña lun Búngiu luágu láu sun lan lidámun jumá meja figoú, guetó jídiña láu ligáburi arúfudajani buíti le jagáambubei, táu sun janígi. ¹⁸ Mámaadün idámuni lun figoú, lidámunjadün Búngiu. ¹⁹ (Nadímurejaña jun láu jémpulu le, le luáguti idámuni lúma labúreme, lúntima gunfaráanda jumánina.) Ítara queí meja lidámun jumá sun luwúyeri figoú, guetó lúnti jíábin lun lidámun jumá buri cátei le buídubei, lun jabágaridun ában ibágari derégeguañu lun Búngiu.

²⁰ Lídan buri meja dan ligíra, dán meja le lidámuñadün lan figoú, mebéreseguntün meja lun jabágaridun ában ibágari buíti ligíbugiñe Búngiu. ²¹ ¿Ca mejáti cátei buíti lanúgübeí buri cátei ligía jun le áubei buri nibúsigari jumá guetó? Ni cáta buíti, féridi rügúñein lanúga jun. ²² Ánjeinti guetó, mámaadün lábugiñe lugúmadin figoú, lidámujadün Búngiu, barútiti cátei le arúmani tun janígi lúma ibágari magúmuchaditi jun. ²³ Lugúndun ouweni lafáyeijabei figoú, ánjeinti edéweejani le líchugubei Búngiu woun, ibágari le magúmuchaditi ladúga lídaañadiwa lan ában lúma Wabúreme Jesucrístu.

7

Ában jémpulu lídaangiñeti maríei

¹ Nidújeñu, jugúya le subúdíjabúbei lun lúruđu, subúdí jumáli luágu dán rügúñein lan wínwangili ában gürígia, ligía lábugiñeñein lan lúruđu. ² Quei jamúga, ában wúri to maríeitu, rúlumutu lúruđu lábun lagúmadijan túmari sun dan le wínwangili lan, ánjein ouwe túmari, bougudijaru lueí lúruđu le íchugubarun lábugiñe lagúmadijan túmari.

³ Ánjoun lubeíti agánawa lúma ámu wügúri sun wínwangili lan túmari, tadúgüña figou le gíribei adultériu, ánjein ouwe túmari, gidáaru lábugiñeñe lúruđu ligía, áni gayáraati tamárieidun lúma ámu wügúri, madúgüntu adultériu.

⁴ Ítara giñe jugúya, nidújeñu, láu loúnwen Crístu, furíjadün lábugiñeñe lagúmadijan lilúrudun Moisés queísi wúri to jiláli túmari, ába tagámaridun ámu. Guetó, lánijadün Crístu, le saráalibeí lídaangiñe ouweni, lun gayáraabeí lan jesériwidun lun Búngiu le gumúti.

⁵ Lubáragiñé meja werésibiruni Crístu, seríwiti meja lilúrudun Moisés lun lagáguduni luríban ayúmajaní wádan, áni ligía cátei le anúgüwaliwa lídoun ouweni.

⁶ Ánjeinti guetó, jiláadiwa lun lúruđu ligía lé meja gámabaliwa lábugiñe lubáfu, guetó furáangujadiwa lun wesériwidun lun Búngiu lídan iséri luwúyeri, táu sun wanígi, láu ubáfu le líchugubeí Sífiri Sándu woun, máma queísi idámuni lun binádu lilúrudun Búngiu le bürúwabeí.

Igáburi lánina figou le wádaanbei

⁷ ¿Waríñaguba lubeíti luágu wuríba lan binádu lilúrudun Búngiu? ¡Máma líña! Láu sun líra, lúruđu asúbudiragüdübalin figou nun. Ibídiñeti jamúga nun luágu figou lan lawámađirun jamégen ámu ánjein jamúga

maríñagunti lúrudu. “Mawámadirabeí jamégen ámu.”
⁸ Ladúga méme gumádi le, ába lagáguduni igáburi lánina figoú le nídaanbei sun luwúyeri luríban ayúmajani nídan. Lugúndun lun jamúga úa lan lúrudu, larúmuguñá yebe lubáfu figoú. ⁹ Níjein meja ában dan, lubáragiñe nasúbudiruni laníchigu lilúrudun Búngiu le tímatimaati, ába narítangun luágu úaragua lan nigáburi ligíbugiñe Búngiu, dan le nasúbudirubalin laníchigu lúrudu ligía, ába nasúbudiruni luágu gafígoun nan, luágu lídaañadina lan úma lun féridi. ¹⁰ Ítara líña, lúrudu le jamúga lúnbei yebe líchugun ában ibágari buíti nun, arúfudarügü lumúti nidúnrun lúma lafáyeiruaja. ¹¹ Lugúndun lárügüdün igáburi lánina figoú le nídaanbei lueígiñe lúrudu ligía, ába leyéeragunina lun nadúgüni le wuríbabei, ába lanúgünina lídoun féridi láu meme lúrudu ligía.

¹² Sánduti lubeíti lilúrudun Búngiu lídaangua, sánduti giñe sun gumádi le lídaanbei, úaraguati, áni buíti. ¹³ ¿Ligía funásan cátei buíti le anúgübalina lídoun féridi? ¡Máma líña! Nífígoun anúgübalin neféridirun nun, áni ítara líña larúfuduni luágu figoú lan, láu cátei le buídubei, le méme lúrudubei, lanúgana igáburi lánina figoú le nídaanbei lídoun féridi, áni ítara líña larúfuduni lilúrudun Búngiu luágu wuríba lan figoú le tímatimaati.

¹⁴ Subúdi wamúti luágu lídaangiñe lan Sífiri Sándu líchigei Búngiu lilúrudun, ánjeinti áu, queísi wügüri garaúwarügüti, alúgurúañu níña queísi idámuni lun lubáfu figoú. ¹⁵ Úati gunfaráanda náani ca lan susérebei nun, madúgün numúti cátei buíti le nabúseerubei nadúgün, nadúgei cátei le iyéreegubei nun. ¹⁶ Ánjein le lubeí mabúseerun nubeí nadúgün ligía nadúga, úaraguati nisáminan lúma lilúrudun Búngiu luágu cátei le buídubei,

áni láu líra, arúfuda numúti luágu barúnaani lúruudu quei cátei buíti. ¹⁷ Mámaadina lubeíti áu adúgübalin cátei wuríbati le nadúgübei, igáburi lánina figoú le nídaanbei, ligía adúgübalin. ¹⁸ Subúdi numúti luágu úa lan ni cáta buíti nídan boúgudin lueí Búngiu, áu queísi wügúri garaúwarügüti. Buséntina jamúga nadúgüni le buídubei, siñáti nadúgüni. ¹⁹ Madúgün numúti cátei buíti le nabúseerubei nadúgün, nasígirarúga adúgei wuríbati le mabúseerun nubeí nadúgün. ²⁰ Ánjein lubeíti le lubeí cátei le mabúseerun nubeí nadúgün ligía nadúga, lídan linárün cátei, máma áu le lání Búngiu adúgübalin, igáburi lánina figoú le nídaangilibei, ligía adúgübalin.

²¹ Niján cátei le asúseredubei nun. dan le busén nan nadúgüni le buídubei, wuríbati rügúñein nadárira nídan. ²² Lídan nisáminan, jinsiñeti lilúrudun Búngiu nun, ²³ áni aríjatina luágu níjein lan cátei nídan, ageíndaguti lúma nisáminan, cátei ligía, igáburi lánina figoú le nídaanbei, le gámabalina adaürúwañu.

²⁴ ¡Fugiábu áu! ¿Cába eséfurana lídaangiñe igáburi lánina figoú le nídaanbei, le anúgübalina lídoun ouweni? ²⁵ Búngiu gubeírügü, lídaangiñe Wabúreme Jesucrístu. ¡Teínqui níña lun Búngiu! Gunfaráanda numúti lubeíti luágu áu lan láu nání núngua, úouga lubáfu Crístu nuágu, buséntina jamúga nagúnfulirun lúma lilúrudun Búngiu, siñá numuti ladúga igáburi lánina figoú le nídaanbei, seríwirügütina lun figoú queísi lidámun.

8

Wabágari lúma Sífiri Sándu

¹ Guetó, gidáwaali jadúnrun gürígia ja lídaanbaña ában lúma Jesúsu. ² Rúlaali Crístu lání Espíritu woun,

áni Espíritu ligía, rúti iséri ibágari woun, furígüda láadiwa lábugiñegiñe lubáfu figoú le anúgübaliwa lídoun ouweni. ³ Mabáfuti meja lilúrudun Búngiu lun lagídaruniwa lábugiñegiñe lubáfu figoú ladúga turíban wanígi, wagía gürígia garaúwarügütiña. Ába ladúgüni Búngiu le lásiñerubei lilúrudun adúga láu loúnajani Liraú ubouágun queísi gürígia garaúwarügüti le gíñe gayáraati lafigounjan (láu sun, mafígonjan lan). Ába loúnwen Liraú Búngiu, le Jesucrístubei, luágu wafígoun, ába lagúmuchaguagüdüni lubáfu figoú wawágu láu loúnwen. ⁴ Ladúgünbalin Búngiu líra, lun gayáraabei lan wadügüniwa gürígiame richáguatiña queísi lagúmadijan lilúrudun, gürígia ja mabágaridunjañabaña lídan luríban jagúndan, ja abágariduñabaña guetó queísi lugúndan Sí-firi Sándu.

⁵ Ja abágaridubaña queísi jagúndan queísi gürígia garaúwarügütiña, luágu rügüñein cátei le lánina ubou jarítagua, ánjaña ja abágaridubaña queísi lugúndan Sífiri Sándu, luágu cátei le lánina siélu jarítagua. ⁶ Dan le jabágaridun gürígia queísi jagúndan, marítagunga jagía luágu Búngiu, barú lumútiña lídoun ouweni, ánjeinti dan le jabágaridun queísi lugúndan Sífiri Sándu, barú lumútiña lídoun ibágari tímatimaati luma darángilaü. ⁷ Ja arítagubaña luágu cátei le lánina ubou le, láganiñu Búngiu lugúndan mája jáña, áni siñá ligía jíchaagun jóungua lábun lilúrudun. ⁸ Ligía, ja lubeí abágaridubaña láu jagúndan queísi gürígia garaúwarügütiña, siñáti jadúgüni lugúndan Búngiu.

⁹ Ánjeinti jugúya, mabágaridunjadün lídan jugúndan queísi gürígia garaúwarügütiña, jabágariduña lídan ában luma láni Búngiu Espíritu, queísi aganoúa lubeí jídan.

Le úabei láni Crístu Espíritu lúma, máma lánigu Crístu. ¹⁰ Ánjein wínwan lubeí láni Crístu Espíritu jídan, wínwan-boun juwáni lun sun dan ladúga tarúfudúniwa richáguañu ligíbugiñe Búngiu, láu sun loúweba lan júgubu ladúga figoú le lídaanbei uboú le. ¹¹ Ánjein wínwan lubeí láni Espíritu jídan, Búngiu méme le ásaaragüdúbalin Jesucrístu lídaangiñe oúweni, líchuguba ibágari iséri lun júgubu le goúwedadibei, lídaangiñe láni Espíritu le jídaanbei.

¹² Ítara líña lubeíti, nidújeñu, lúnti wagúnfulirun lúma Sífiri Sándu le wádaanbei, máma lúma wagúndan queísi gürígia garaúwarügütiña. ¹³ Lugúndun ánjaün abágari-darügü queísi jugúndan, queísi gürígia garaúwarügütiña, jeféridiruba, mídinbadün siélu, ánjein jáfara igáburi lánina figoú le jídaanbei jilágubei, láu lubáfu Sífiri Sándu, jabágariduba lun sun dan lúma Búngiu siélu.

¹⁴ Sun ja ladúndejabaña láni Búngiu Espíritu, lirájüñü Búngiu. ¹⁵ Sífiri Sándu le jerésibirubei, máma ában espíritu lánina idámuni lúnya lanúfudedagüdúnün lueí láburujan ligáñi Búngiu juágun, Espíritu le jerésibirubei, ligía le adúgübalün lun lirájüñü jumá Búngiu. Ligía gayára lubeí wagúaruni Búngiu Wáguchi. ¹⁶ Geféenti láni Búngiu Espíritu woun luágu lirájüñüjadiwa lan Búngiu. ¹⁷ Áni ladúga lirájüñü wamá Búngiu, garíchatiwa gíñe lun alágan siélu le uágubei laríñaga Búngiu woun, le lúnbei gafánran wamá lídaangiñe, lúma Crístu. Ánjein sáfuri wabeí luágu Crístu ya uboúagu, gafánraanbadiwa lídan luweírigun yágüta siélu.

¹⁸ Jarítaguatina luágu ni cáta lan le wasúfurirubei ya uboúagu lúmoun uweíriguni le lúnbei wabíjini siélu. ¹⁹ Láuñein sarágu ayúmajani lúma eménigini sun uboú le ladúgübei Búngiu, agúrabei dan le lúnbei jerésibiruni

lirájüñü Búngiu jalágaante. ²⁰ Níjein mégeiti luágu sun uboú, máma jamúga ladúga labúseerun, ladúga ítara líña lan labúseeruni Búngiu, ²¹ láu sun líra, súnwandan níjein lan eménigini luágu leséfuruba lan uboú lídaangiñe asúfuriruni lúma agádeiruni le gádaanbalin lun gafánraanbei lan lídan jaweírigun lirájüñü Búngiu. ²² Subúdi wamúti luágu chülú lan lúmoun dan le, sun uboú le ladúgübei Búngiu ayájuati láu igárigu camá ában wúri to agáridutu. ²³ Áni máma rügüñein uboú asúfurira, súfuritiwa gíñe, wagía afñetiña luágu Crístu, láu sun níjeinjali lan Sífiri Sándu wáma queísi lagúmeseraja cátei le lúnbei werésibiruni. Sandítiwa ában oúnwenbun igári, áni agúraba wamúti dan le lúnbei wayábin lun lirájüñü-jadíwa lánme Búngiu le tímatimaati, dánme le liséridun wágubu. ²⁴ Ligía lágüdaja wasálbarun. Merésibirun wamágili sun ubuíduni le lúnbei wabíjini queísi lirájüñü Búngiu, agúrabajatiwa werésibiruni yágüta siélu. Ánjein jamúga ibíja wamáaliti sun le lúnbei wabíjini queísi lirájüñü, mébunaali jamúga wagúrabajan. Magúrabajaan-tiña gürígia jerésibiruni cátei le ibíja jamáalibei. ²⁵ Queíti merésibirun wamágili lubeí sun le lúnbei wabíjini queísi lirájüñü Búngiu, lúnti wagúrabuni láu gurásu.

²⁶ Ítara méme gíñe, íderagua lumútiwa Sífiri Sándu lídan wadébilin. Queísigubeirügü níjein dan, siñáti wayúmuragun lun Búngiu queísi lubúdubu. Lídan óra ligía, ába líderaguníwa Sífiri Sándu lun waríñaguni luweírin cátei le wasándirubei tídan wanígi lun Búngiu lídan ában luwúyeri le siñáti laríñawagún láu dimúrei. ²⁷ Áni Búngiu, le aríjubarun wanígi, subúdi lumúti ca lan labúseerubei Sífiri Sándu laríñagun wádaangiñe, ába loúnabuníwa Búngiu lugúndun ayúmuraguati Espíritu queísi lugúndan Búngiu.

Agáñeiruni lídan sun luwúyeri lénreengúnga

²⁸ Subúdi wamúti luágu aráanse láani Búngiu lun sun lan cátei le asúseredubei woun, íbini asúfuriruni, lun lanúgün buíti woun, wagía le jínsiñejabúbei lun, wagía le wájali lan lun lánigu wamá queísi larítaguni. ²⁹ Lugúndun ja lasúbudirubaña Búngiu lúmagiñe lubáragiñe ladúgüni uboú luágu lánigubaña lan, fánrein lumútiña lun ítara jamá queísi Liraú, lun Liraú lan íbugañau joun sun ja lanúadirubaña lun lirájüñü jamá. ³⁰ Játi lanúadirubaña lúmagiñe binárü, wáti gíñe joun, resíbi lumútiña gíñe lúmagua queísi gürígia richáguatiña, áni ja lerésibirubaña, rúti gíñe ufánrani joun lídan luweírigun queísi lirájüñü.

³¹ ¿Cábatí waríñaga luágu buri cátei le? Queísi lueígiñeñein lubeí wafúleisein Búngiu, ¿cábagi jabáfu wáganiñu wawágu? ³² Mamájaanti Búngiu lun líchuguni Liraú guánarügü lun loúnwen luágu wafúleisein, lubáragiñe líra, ába ledéregeruni lun loúnwen waweígiñe, sun wagía, ¿ida lubáti míchugun láani sun líbiri cátei woun queísi líchuguni Liraú woun? ³³ ¿Cági gayáraabei líchugun jadúnrun ja anúadaja láañabaña Búngiu queísi lánigu? Búngiu arúfudubaliña quei madúnruntiña. ³⁴ ¿Cáteiti gayáraabei lasíadiruníwa lun féridi? Crístu guánarügü ouwebei wawágu, ába lásaarun lídaangiñe ouweni, guetó níjein ñun lueígiñe loúnwenren Búngiu Úguchili ayúmuragua wawágu. ³⁵ ¿Cábatí gayára lagídaruníwa lueí línsiñejabu Crístu? ¿Liyáraabadiwa funági asúfuriruni, o lénreengúnga, o eíbaajóuni, o ilámai, o manáanguni, o pelíguru, o ouweni? ¡Uá! ³⁶ Laríñajare tídan Lerérun Búngiu.

Yaráfatiwa lun woúnwen bueígiñe ságü wéyu,
ítara líña jóuseruniwa wáganiñu queísi mudún anügútiña
lun jafarún.

³⁷ Lídán sun cátei le, ibíja wamúti luweírín lubáfu Crístu, le jínsiñejabúbei woun, lun wagáñeirun lídan sun lén-reengúnga. ³⁸ Choúru numúti lubeíti luágu úa lan ni cáta lun lagídaruníwa lueí línsiñejabu Búngiu—ni ouweni, ni ibágari, ni ánjeligu, ni máfianu, ni cátei le guetóbei, ni le lúnbei liábin, ³⁹ ni le siélubei, ni le ubouágubei, ní buri ámu cátei le ladúgübei Búngiu—siñáti lagídaruníwa lueí línsiñejabu le larúfudubei woun lídan Wabúreme Jesucrístu.

9

Anúadaja láaña Búngiu Israelítagu lun lánigu jamá

¹ Inárüni le lúnbei naríñaguni guetó jawágu nirásan, áu queísi ában afíñeti luágu Crístu, áni meyéejantina, aríñaga tumúti nanígi nun to úraguaboun lúma Sífiri Sándu luágu inárüni lan. ² Weíríti nírun, áni súnwandan níjein lan gáriti tídan nanígi jawágu nirásan. ³ Buséntina jamúga lun gíñe lábugiñe nan líñaragun Búngiu, díseñu lueí Crístu, ánjein jamúga ítara lúba lubeí gayára lan jerésibiruni Jesucrístu queísi jasálbaragüle lun jasálbarun. ⁴ Linébaanfaangu Israél jagía, áni resíbi lumútiña Búngiu queísi lirájüñü. Reídeítí meja Búngiu jádan láu sun luweírígún áni rúlumuti gíñe darádu buri joun lúma lilúrúdu lídaangiñe Moisés. Arúfudati igáburi joun lun jesériwidun lun, ligílisirugu, áni joun lariñaga luágu loúnajaba lan ában Asálbaragülei. ⁵ Janébaanfaangu Abrahám, Isáac lúma Jacób jagía, lídaangiñe jarásan liábin Crístu, le Búngiubei, le gíñe Súnti Gabáfu, le gadúnamabei lun liñurúniwa líri lun sun dan. Ítaralá.

⁶ Mámata luágu jamúga reídei lan lerérun Búngiu joun ladúgawagun Israél magúnfulirunga, ladúga máma sun Israelítagu lánigu Búngiu le tímatimaati. ⁷ Máma

sun linébaanfaangu Abrahám lirájüñü Búngiu le tímatimaati, aríñagarügüti méja Búngiu lun Abrahám. “Lí-daangiñerügüba Israél ganébaanfaangu ban.” ⁸ Arúfuda lumúti líra woun luágu úa lan ni ában liraú Búngiu luágurügü lirásan, ja rügúñanu lirájüñü ladúga jafíñerun luágu lerérun, jagía anügúbaña queísi lirájüñü ja tímatimaatiña. ⁹ Lugúndun niján dimúrei le líchugubei Búngiu lun Abrahám. “Niábinba dánme le lachúlürün dan ligía, ábame tagáraüdüñ Sára ában irájü.”

¹⁰ Áni máma rügúñein líra, niján ábanya jémpulu luágu lanúadajan Búngiu. Biángubei meja tirájüñü Rebéca ában jáguchi, le binádu wadúje Isáac, ¹¹⁻¹³ áni dán meja le magúriajoongiña, madúgüongiña gíñe ni cáta ni buíti ni wuríbati, ába laríñagun Búngiu tun Rebéca. “Lumúsunbei amúleñein le íbugañaü.” Úaraguati gíñe líra luma le aríñawagúbei tídan Lerérun Búngiu. “Jínsiñetí meja Jacób nun, ánjein Esaú, iyéreeguti nun.” Ítara líña gufírümawa lan lirícha Búngiu lun lanúadajaniña ja únbaña labúseera lagúarun lun lánigu jamá queísi labúseeruni, mebéré-senga ligía ca lan jadúgübei.

¹⁴ ¿Cábati waríñaga? ¿Waríñaguba luágu múaran lan Búngiu? ¡Siñáti! ¹⁵ Lugúndun laríñajare lun Moisés. “Gareínibadina lun le nabúseerun, gudémejabu áume lun le únti nabúseera.” ¹⁶ Ítara líña lubeíti, máma lídaañein wabúseerün o wáfaagun, lugúdemejabu Búngiu woun, lídaañein lugúndan. ¹⁷ Tídan Lerérun Búngiu, bürúwañu líña dimúrei le laríñagubei lun urúei Ejiptona. “Nadúgünbálibu urúeime lun narúfuduni nubáfu buágu, lun gíñe nasúbudiragüdüni níri lídan sun fulásu.” ¹⁸ Gudémejabuti lubeíti Búngiu lun le labúseerun gudémejabu lan, derégü-daloún lanígi le únti labúseera ledéreragüdüñun.

¹⁹ Baríñaguba lubeíti nun. “Ánjein ítara líña lubeí, ¿cáti uágu líchiga Búngiu dúru jawágu gürígia? ¿Cági gayáraabei ladúgün cátei bouguditi lueí lugúndan Búngiu?” ²⁰ Wel, ¿cátabuñadíbugi lun balégejan lúma Búngiu? ¿Laríñaguba funági soúdieru lun le adúgübalin. “¿Cáme badúgana ítara?” ²¹ Garíchati le adágubei soúdieru lun ladúgüni le labúseerun láu lubúñe soúdieru, gayáraati ladúgün ában soúdieru le díseguati layúsurun, lúma ában le ayúsurúti lun furúmieguarügü cátei lídaangiñe ában méme ubúñei.

²² Ítara méme líña, gabáfuti Búngiu jawágu gürígia, aráanseñu líña lun larúfuduni luweírin ligáñi jawágu gürígia ja gadúnabaña jagúnrinchawagún. Áfaaga lumúti jaríban láu sarágu gurásu darí guetó ²³ lúnrügü gayára lan larúfuduni luweírin luweírigun woun, wagía le únbaña gudémejabu lan, ja gíñe laráanserubaña lúmagiñe binárü lun gafánraanbadiwa lan lídan luweírigun. ²⁴ Wáti Búngiu woun, jíbiri jádaangiñe juríu, jíbiri jádaangiñe ja mámabaña juríu, ²⁵ queísi laríñagun Búngiu tídan lilíburun Oséas.

Já meja mámabaña nánigu, naríñaguba joun. “Nánigu”, gürígia méja ja mínsiñebaña nun, naríñaguba joun. “Jínsiñetün nun”.

²⁶ Áni lídan méme fulásu le ní lubei laríñawagúa joun. “Máma nánigu jugúya”,

ñíba laríñawagúa joun. “Lirájüñü Búngiu le wínwanbei”.

²⁷ Ánjeinti jawágu Israelítagu, ja méme juríubaña, laríñajare Isaías. “Láu sun gíbe jamá ladúgawagun Israél quei ságoun láru béya, bíanraürügúbaña jádaangiñe erédera lun jasálbarun, ²⁸ lugúndun lagúnfulirubei Búngiu lerérun ligíbuagu ubouú lun lagúnrinchaguniña

ja magáambadibaña lun, lídan ában igáburi le gumúti, le gíñe furéseti.” ²⁹ Queísi méja laríñagun méme Isaías.

Lun jamúga meja mígirun lan Súnti Gabáfu jádaangiñe
wadúgawagun woun,
wayábiña jamúga lun ítara wamá queísi ubúrugú buri
Sodóma lúma Gomórra.

Juríu lúma ugánu luáguti Crístu

³⁰ ¿Cábati waríñaga? Luágu ja lan mámabaña juríu, ja mibíjinalin lilúrudun Búngiu lun jasúbudiruni le buídubei lúma le wuríbabei, jagía anügúbaña quei richáguatiña ligíbugiñe Búngiu ladúga jafíñerun luágu.

³¹ Ánjañati ladúgawagun Israél, ja áfaagubaña lun jerésibirúniwa queísi gürígia richáguatiña láurügü jagúnfulirun lúma lilúrudun Búngiu, siñá jamuti lúrudu ligía agúnfulira, machúlüntiña lun richágua jamá ligíbugiñe Búngiu. ³² ¿Cági uágu? Lugúndun máfaagun jamá lun jeréderun buídu ligíbugiñe Búngiu luágurügü jafíñen, jadúgeirüga láu cátei le guánarügü jadúgübei. Ligía jachúgeragunbei luágu Jesucrístu queísi “dúbü le achúgeraguágülei”, ladúga siñá lan jafíñerun luágu queísi Jasálbaragüle. ³³ Laríñajare tídan Lerérún Búngiu.

Rútina ában wügúri le queísigubeirügübei dúbü
le achúgeraguágülei Sión, dúbü gíñe le
eíguadagüdúti gürígia.

Ánjeinti le affíneruti luágu, maságürijanbei.

10

¹ Nidújeñu, le cátei le uágubei tayúmaja nanígi, lúma le uágubei nayúmuragun lun Búngiu jawágu Israelítagu, ja méme juríubaña, lun jasálbarun. ² Aríñagatina luágu

jafúleisein luágu níjein lan ában oúnwenbun gúnfuli jádan lun Búngiu, máma queísi laríñagun subúdi jagúnfulin. ³ Ibídiñeti joun ída líña lan ligáburi líchuguniña Búngiu gürígia richáguañu ligíbugiñe, láu igáburi le jabúseerubei jáluajan jeréderun richáguañu ligíbugiñe Búngiu, madúgünga jameí le labúseerubei. ⁴ Lugúndun Crístu lébejabei lagúnfulirúniwa lilúrudun Moisés, áni adúgati lun sun lan ja afíñebaña luágu, jeréderun richáguañu ligíbugiñe Búngiu.

⁵ Luágu lerésibiruniña Búngiu gürígia queísi gürígia richáguañiña láu jagúnfuliruni lilúrudun, laríñajare Moisés. “Gürígia ja agúnfulirutiña lúrudu le gumúti, jabágariduba luágu lúrudu.” ⁶ Luáguti lerésibiruniña Búngiu gürígia queísi richáguañiña ligíbugiñe luágu jafíñen, laríñajare. “Maríñagabá tídan banígi. ¿Cába amúdeira siélun?” —queísigubeirügü barárigüdüñein lan Crístu le Wasálbaragüle siélugiñe. ⁷ Maríñagabá giñe. “¿Cába arárira le ñíjin jabei jiláaña?” —queísigubeirügü bamúdeiragüdüñein lan Crístu jádaangiñe jiláaña ítara. Úati ni cáta lun wadúgüni lueídügüya lun wafíñerun luágu. ⁸ Cáteiti laríñagubei Búngiu? “Yaráfati ugánu lánina asálbaruni bun, adímurejatibu luágu ugánu ligía láu biyúma, níjein giñe ugánu ligía tídan banígi.” Ugánu le, elun?” —queísigubeirügü barárigüdüñein lan Crístu le ligía ugánu le lánina afíñeni luágu Crístu le Wasálbaragüle, le wapúrichijabei. ⁹ Ánjabu aríñaga láu biyúma luágu Jesúsu lan Babúremebei, afíñe amúrü tídan banígi luágu sarágüda láani Búngiu lídaangiñe oúweni, basálbaruba. ¹⁰ Láu bafíñerun luágu Jesucrístu táu sun banígi, lerésibirabu Búngiu queísi ában gürígia richáguañiña ligíbugiñe, láu bíchugun fe luágu láu biyúma, basálbara.

¹¹ Taríñajare Lerérun Búngiu. “Úati ni ában gürígia le

afñeruti luágu Jesucrístu lun laságürijan luágu lárigiñe.”
¹² Ában jáu juríu jáma ja mámabaña juríu, Wabúreme Jesu-
 crístu, ligía Jabúremebei súnqubei, áni fuleísei lumútiña
 sun ja agúarubaña lun lun líderaguniña. ¹³ Ítara líña
 quei laríñawagún tídan Lerérun Búngiu. “Sun ja aguáruti
 líri Wabúreme, jasálbaruba.” ¹⁴ ¿Ída lubáti gayára lan
 jagúaruni lun lasálbaruniña ánjein mafñerungiña lubeí
 luágu? ¿Ída lúba giñéti gayára lan jafñerun luágu,
 ánjein magáambungiña lubeí luágu? ¿Ída lubáti gayára
 lan jagáambun luágu, ánjein uá jabeí apúrichijati ugánu
 luáguti asálbaruni joun? ¹⁵ ¿Ída lubáti gíñe gayára lan
 japúrichijan gürígia joun ánjein uá cába lan oúnajaña
 apúrichija? Queísi laríñawagún tídan Lerérun Búngiu.
 “¡Ma lubuídun jachúlürün ja anúgübalin ugánu luáguti
 aráandaruni lúma Búngiu, apúrichija jameí ugánu buíti
 luáguti asálbaruni!”

¹⁶ Másutiña gürígia ja agáamba jamáalibei ugánu
 luáguti asálbaruni ebéresera láu. Queísi laríñaguni Isaías
 tídan lilíburun. “Wabúreme, míbetiña afñerutiña luágu
 ugánu luáguti asálbaruni le wapúrichijabei.” ¹⁷ Ítara
 líña lubeíti, lídaangiñe jagáambuni gürígia ugánu luáguti
 Crístu gayára lan jafñerun luágu.

¹⁸ Ába naríñagun. ¿Magáambun jamúba giñéti gayára
 lan jafñerti funásan ugánu luáguti asálbaruni? ¡Agáamba
 jamúti! Taríñajare Lerérun Búngiu.

Agaambúaaali jamálali lídan sun fulásu,

chúlújali jerérun lídoun lagúmujoún larígei uboú.

¹⁹ Ába naríñagun. ¿Úagili funásan gunfaráanda jamáni
 Israelítagu ugánu luáguti Wasálbaragüle? Gunfaráanda
 jamáali, lugúndun lídan furúmiñeti cátei laríñajare
 Búngiu liyúmulugugiñe Moisés.

Naméendidagüdúbadün jadúga ában rása ja máma náni,
nagáñidagüdúbadün jadúga ában rása ja ibídiñegidina
joun.

²⁰ Aríñagati gíñe Búngiu liyúmulugugiñe Isaías.

Darí jamutina ja máluajaanbalina,
arúfudaguatina núngua joun ja málügüdajánbaña nuágu.

²¹ Ábaya laríñagun jawágu Israelítagu. “Sun wéyu náu
agúaja joun gürígia magáambaditiña, mabuídun.”

11

Israelítagu ja sálbabaña

¹ Aríñagatinati guetó. ¿Májaali funásan Búngiu joun
Israelítagu ja lumútuniña? ¡Máma líña! Áu guá-
narügü Israelíta áu, jádaangiñetina lirásan Abrahám, já-
daangiñe lufámilian Benjamín. ² Barú lumútiña Búngiu
Israel-ítagu queísi lánigu lúmagiñé meja binárü, guetó,
mamájaanti joun. ¿Magáambun jumúti le taríñagubei
Lerérun Búngiu luágu Elías, lé meja proféta, luágu
líchuguni dúru jawágu Israelítagu lídan layúmuragun lun
Búngiu? Laríñaga. ³ “Nabúreme, áfaragua jamá profétagu
jilágubei, güríngua jameí buri báni latárü, áu rügáli
erédera jádaangiñe bánigu, áni buséntiña gíñe jáfarunina
jilágubei.” ⁴ Ába laríñagun Búngiu lun. “Anuádajaadina
sédü mílu wügúriña nubárúa ja májuduragúngiñabaña
ligíbugiñe liyáwa búngiu le Baal.” ⁵ Ítara méme gíñe
lídon buri wéyu le, reídeijaña átiri jádaangiñe juríu ja
anuádaja láañabaña Búngiu láu lareíni. ⁶ Ánjeinti láu lubeí
lareíni Búngiu lanuádiraña, mámaali láu cáte le liyáraati
gürígia guánarügü adúga, lugúndun lun jamúga ítara líña
lan, mámaali jamúga areíni lareíni Búngiu.

⁷ Ítara líña lubeíti, madári jamúti sun Israelítagu le
jáluajabei, anáti ja lanuádirubaña Búngiu, darí jamuti. Ja

jíberi, siñáti jánjanrun lun asálbaruni le lébunabei afíñeni luágu Búngiu, ába lígiruniña Búngiu táu tidére janígi.

⁸ Queísi taríñagun Lerérun Búngiu. “Adúga lumútiña Búngiu lun deré lan jachúgü lun cátei lánina Búngiu, rúti águu le maríjinti joun, arígeirugu le magáambuti. Ítara liñáti chülú lúmoun dan le.” ⁹ Aríñagati Davíd.

Garábagua lámuga jefédujan lun sádarame, lun jáburujan tídoun, lun jasúfurirun.

¹⁰ Darú lámuga jágu, maríjin jamámuga, sebúgua lámuga gíñe janágan lábugiñe janúgün lun sun dan.

Jasálbarun ja mámabaña juríu

¹¹ Nálügüda jaati guetó. ¿Láu jachúgeragun juríu, ja méme Israelítagu, jeíguatiña funásan le gumúti? ¡Máma líña! Lubáragiñe líra, láu jamájarun juríu lun jerésibiruni Crístu, jayábin ja mámabaña juríu lun jabíjubei lan asálbaruni, lun jáyeijabaña lan Israelítagu. ¹² Ánjeinti seríwi lubeí dúru le jadúgübei juríu buítme lun ubóu, áni ánjein buíti lubeí lanúgübei jeféridirun joun ja mámabaña juríu, ¿sarágume buídutimaabei lan dánme le jasálbarun sun juríu!

¹³ Níjein gíñe ában cátei lun naríñaguni jun, jugúya le mámabei juríu. Quei loúnajañadina lan Búngiu apúrichija luágu Crístu joun ja mámabaña juríu, weíríti nubéresen láu nuwádigimari, ¹⁴ lun gayára lan jabúseerun nirásan jáyeijanün, lun gíñe jasálbarun. ¹⁵ Ánjein ladúga lubeí lamájarun Búngiu joun juríu, jayábin ja mámabaña juríu lun jaráandarun lúma Búngiu, ¿ídatimá lubáti dánme le jerésibirúniwa? Ítara lúba joun queísi ásaaruni lídaangiñe ouweni. ¹⁶ Ánjein derégewa tubeí furúmiñetu fein to adügútu tídaangiñe fulúwaaru añóundawagutu lun

Búngiu, derégewatu gíñe sun fulúwaaru ñóunwaguatu to ídaangiñeboun tiábin fein tugúya. Ánjein gíñe derégewa lubeí títlagüle ában tídibu wéwe lun Búngiu, derégewañu líña gíñe tilímun.

¹⁷ Añájein jádaangiñe juríu, queísi tilímun olívo tíma-timaati, chaúnwatiña, gidáwatiña jagánaguagiñe lumútuniña Búngiu ladúga maffíneni le jádaanbei. Jugúya jawéñegubei, jugúya le mámabei juríu, ja ítarabaña quei tilímun olívo to áraabuna. Ítara líña jiábin lun gabára jumá lídan títlagüle lúma lídan tibágari olívo, resíbi jugúyame labínirun Búngiu, queísi lumútuniña.

¹⁸ Marítagua jumátia luágu buídutimá jumá lueí límu le ñígubebei méja. Ánjaün arítagua luágu buídutima jumá, jarítagua jumá luágu máma lan jugúya ágüdjabalín ílagülaü, luágu ílagülaü lan ágüdjabalün.

¹⁹ Fágua jaríñaguba. “Ánja, ába jagídarúniwa juríu lun wíchugún jawéñegua luágu olívo.” ²⁰ Jinárün luágu gidáwa jamá jagánaguagiñe lumútuniña Búngiu, jagídarúnbei lugúndun maffínen jamá luágu Wasálbaragüle, jugúya, gabára jubeí ladúga jaffínen luágu. Manáangua jumá lubeíti júngua, duárirügü jumá. ²¹ Lugúndun ánjein úa lubeí ferúduna láníña Búngiu juríu já meja lanúadajabaña lun lánigu jamá, úabei gíñe ferúduna lánün, jugúya le mámabei juríu, ánjaün ñúbin lun maffínen jumá. ²² Aríja jumeí lubeíti luweírin lareídun Búngiu, derégüdati gíñe. Derégüdati joun ja maffínebaña, areídati joun ja affínebaña. Lúnti jasígirun lídan lareíni láu sun jaffínen luágu, ánjein madúgün jumá ítara, jagídarúba gíñe. ²³ Ánjaña ñúbin juríu lun jaffínerun luágu Crístu, jíchugúyayaba lídoun jabára jagánagua lumútuniña Búngiu, lugúndun gabáfuti Búngiu lúnya líchuguniña járigoún. ²⁴ Jugúya

le mámabei juríu, chaúnwatün tuegiñe ában olívo to áraabuna, ába jíchugún tuágun olívo to buítu, gúbume ladügúwa joun juríu ja tilímunbaña olívo buítu ja tíma-timaatiña, jíchugúayaba járigouín tuágun olívo to ñígiñe lubeí jagídarúa, naríñaguña luágu lachúlürüba lan wéyu lun jerésibiruni juríu Jasálbaragüle.

Jasálbarun Israelítagu le lagúmujoín

²⁵ Nidújeñu, buséntina lun jasúbudiruni cátei le luáguti laráansejan Búngiu, lé meja arámudagúabei, lun mapán-tajan jumá luágu chu lan jáu lídan le jálügüdagun júngua luágu buri cátei le. luágu deréragüda láaru lan Búngiu janígi Israelítagu murúsun lun Jasálbaragüle darírügü dánme le gumújali jerésibiruni ja mámabaña juríu Crístu.

²⁶ Dánme le lasúseredun líra, ábame jasálbarun sun Israelítagu, ja méme juríu, lugúndun taríñajare Lerérun Búngiu.

Liábinba Asálbaragülei Síongiñe,
ábame lagídarun wuríbani jádaangiñe juríu.

²⁷ Nijánba nidáradun jáma,
dánme le nagídaruni jafígoun.

²⁸ Luágu ugánu le luáguti asálbaruni, barúwatiña juríu queísi láganiñu Búngiu luágu jufúleisein, láu sun líra, jín-siñegiña lun Búngiu lugúndun anúadaja lumútiña binádu jagúbürigu juríu. ²⁹ Lugúndun le cátei le líchugun Búngiu, magída lumúti, gürígia ja lanúadajabaña lun lánigu jamá, lánigumemebaña. ³⁰ Jugúya, magáambaditún meja lun Búngiu, guetó, láu jamájarun juríu jagáambuni, ába gudémejabu lan Búngiu jun. ³¹ Magáambaditiña juríu lun Búngiu guetó, ánjein líra, lúnrüü gü gudémejabu lan Búngiu joun queísi gudémejabu lan jun. ³² Ígira lumútiña Búngiu súngebei lun magáambun jamáni, lun gayáraabei lan gudémejabu lan joun.

³³ ¡Luweírin lareídun Búngiu, lúma lichú láu! Siñáti wasúbudiruni larítangun, siñá gunfaráanda wamáni lémeri. ³⁴ ¿Cági gunfaráandabalin larítangun Búngiu? ¿Cági arúfudajabei lun? ³⁵ ¿Cági gürígia rújalibei som cátei lun Búngiu furúmiñe lun lerésibirun som cátei fáyeitime lárigiñe? ³⁶ Úati ni ában, lúmagiñe Búngiu liábin sun cátei, ligía gíñe ágüdajabalin sun cátei, áni lúngua gíñe ladúgei. ¡Uweíriguni lun Búngiu lun sun dan! Ítaralá.

12

Ibágari le derégewati lun Búngiu

¹ Amúriajatina lubeíti júma, nidújeñu, lun jedéregera-gun júngua le gumúti lun Búngiu queísi gürígia abágaridutiña lun jesériwidun lun, jarúmañu lan jibágari ligíbugiñe. Niján luwúyeri agúnfuliruni le áubei lagúndaara Búngiu, áni lúnti ítara lan wadúgüni lugúndun weíríti lareíni woun. ² Jebé jabágaridun queísi lirájüñü ubou le, lubáragiñe líra, sáansi jumei ligáburi jisáminan, sáansi lámuga gíñe ligáburi jabágaridun. Ítara lúba jiábin lun jasúbudiruni le lugúndaanbei Búngiu jun —le buídubei, le uáraguabei.

³ Queísi jumaésturun luágu lareíni Búngiu nun, aríñagatina jun sun jugúya, lun úa lan ni ában jídaangiñe arítaguti luoúgua weíri sügú láu le ligíabei. Lubáragiñe líra, cáda ában lúnti lasúbudiragun lúngua, según afíñeni le rúlaalíbei Búngiu lun. ⁴ Lugúndun ítara quei gíbe lán buri umégeguni luágu ábanrügü úgubu, áni máma ában méme lifísiute sun umégeguni ligía, ⁵ ítara wáña gíñe, wagía afíñetiña, láu sun gíbe wamá, ában rügüñadiwa úgubu lídan ában lúma Crístu, áni íderaguatiwa woúngua wádaangua queísi lumégegun ában méme úgubu.

⁶ Rújali Búngiu ámuñegueinarügü ubáfu woun queísi labúseeruni líchuguni lun cáda ában, lun wesériwidun lun, luma joun wadújeñu lueígiñe Jesucrístu. Lúnti buídu lan wayúsuruni ubáfu ligía. Ánjein rújali lubeí Búngiu ubáfu woun lun ladímurejan wayúmulugugiñe, lúnti wadúgüni según affíñeni le wádaanbei, ⁷ ánjein rújali lubeí ubáfu woun lun wesériwidun joun ámu, lúnti wesériwidun buídu. Le garúfudajadíbei Lerérun Búngiu, lúnti líchaagun lúngua lun arúfudajani. ⁸ Le gíchigaditi dúgüdaguaü joun ámu, lúnti líchaagun lúngua lun ladúgüni. Le edéweejati, lúnti magúrabun lan láguyun lun, le ábutibei, lúnti lagúmadijan láu sarágu duári, le íderaguti gudémetiña, lúnti ladúgüni láu ugúndani.

Ligáburi jabágaridun lánigu Crístu

⁹ Jínsiñe jamá jidújeñu lueígiñe Jesucrístu jun láu ín-siñeni le inárüñiti. Iyéreegulá wuríbani jun, falájumei le buídubei. ¹⁰ Lúnti jínsiñegua jumá júmagua queísi idújeñu. Furése jumá lun jinúragüdüni jíri jidújeñu.

¹¹ Mamágualigu jumá lídan luwádigimari Wabúreme, seríwi jumeí táu sun janígi.

¹² Abágarida jumá gúndaañu láu eménigini le juágubei, gagúraasun jumá dan le jasúfurirun, ayúmuragua lun Búngiu, eteíngirei, súnwandan.

¹³ Íderagua jumáña affíñetiña lídan jemégeirun, resíbi jumáña ja bisídabalün láu ugúndani.

¹⁴ Amúriaja jumá labínirun Búngiu jawágun ja ouserutün wuríba, amúriaja jumá abíniruni joun, máma wuríbani.

¹⁵ Gúnda jumá jáma ja gúndaabaña, jayájua jáma ja ayájubaña.

¹⁶ Abágarida jumá lídan úaraguni júmawagua. Manáan-gua jumá júngua, gamádagua jumá jáma ja gudémebaña. Marítagua jumá juoúgua queísi sábiugu.

¹⁷ Mafáyeira jumá wuríbani luágu wuríbani lun ni ában. Áfaagua jumá lun jadúgüni le búidubei jagíbugiñe sún-gubei. ¹⁸ Adúga jumeí sun le juáraati lun jabágaridun lídan dan jáma sún-gubei. ¹⁹ Nidújeñu jínsiñetiña nun, mágyuyüda jumeí wuríbani, ígira jumeí lun Búngiu lan afáyeigüda luágu. Tariñajare Lerérun Búngiu. “Áu lúnbei nafáyeigüdüniña gürígia luágu jaríban, líña Jabúreme.” ²⁰ Aríñagati gríñe Búngiu. “Ánjein lámá lubeí bágani, rúba eígini lun, ánjein mágürabu lubeí, rúba dúna lun, lugúndun láu badúgüni líra, lebéloruba busíganu lun luágu luríban louserunibu.” ²¹ Mígiraguagüdába búngua lun lagáñeirunibu wuríbani lun báguyügüdün wuríbani luágu wuríbani, lubáragiñe líra, gáñibeí wuríbani láu buídu le badúgübei.

13

¹ Lúnti jíchaagun sún-gubei júngua lábun jalúrudun gumádimatiña, lugúndun ítara líña laráansejan Búngiu lun ñíbei lan lúrudu, áni gumádimatiña ja lídaanbaña jabára, labúseerun Búngiu añájein lubeí ñi. ² Gürígia lubeíti le awúgürijóuti lun gumádi, múaraanti láu le laríñagubei Búngiu, áni ja awúgürijóutiña ítara, gadún-runtiña luágu líra áni jafáyeiruba luágu. ³ Máma lúnñanu jíchugun gumádimatiña anúfudei joun ja adúgübalin le buídubei, aná joun ja adúgübalin le wuríbabei. ¿Buséntibu babágaridun manúfudeiga lueí lúrudu? Buídulá bouserun, ábame buídu ban lurúma lúrudu, ⁴ lugúndun lesériwiduña lun Búngiu luágu bufúleisein. Ánjein wuríba bouserun, lúnti janúfude ban, ladúga máma luágu ni

cáta gabáfu lan lúrudu lun lafáyeijagüdün luágu dúru, quei lesériwiduña lubeí lun Búngiu lun lafáyeijagüdün luágu dúru. ⁵ Ligía lúnti lubeí úaragua wamá lúma lilúrudun wageíra, mámarügü lun máburujan lan asúfuriruni wawágun, lúnti ítara lan lun jarúmañu lan warítangun. ⁶ Ligía gíñe lébubei jafáyeijan seínsu lun gumádi, lugúndun jesériwiduña lúrudugu lun Búngiu áni lun cátei le jeténira.

⁷ Ru jumeíme le jáni cáda gürígia joun. Fáyei jumeí le lagúburajabei gumádi luágu jufúlasun, lúma buri ámu cátei líbe líra, fáyei jumeí le lúnti jafáyeiruni luágu cátei le ñúbinbei jun bougudigiñe lueí jageíra. Gagáambadi jumá joun gumádimatiña, ru jugúyame inébesei joun queísi lubúdubu. ⁸ Máni jumá dúweiti ni ca úma, lueídügüya lidúweitina ínsiñeni le jadúweirubei júmagua. Le jínsiñejabuti lun gürígia líledi, adúga láali sun le lubeíbei lilúrudun Búngiu láu ladúgüni líra. ⁹ Taríñajare Lerérun Búngiu. “Magámaridabá gürígia maríeitiña, máfarajabá, míwerujabá, maríñagabá iyéeni luágu ni ában, mawámadalá jemégen mútu bun.” Gúnfuli wamáali sun gumádi le, lúma buri le líbiri, láu wagúnfulirun lúma lilúrudun Búngiu le aríñagubei. “Jínsiñelá gürígia bíledi bun queísi bínsiñegua búngua.” ¹⁰ Le jínsiñejabúbei, madúgünti wuríbati lun ni ában, ánjava lubeíti jínsiñejabu, gúnfuli wamáali sun lilúrudun Búngiu queísi lubúdubu.

¹¹ Lúnti ítara lan ligáburi wabágaridun lugúndun wabágariduña lídoun lagúmujoún dan. Dánjali lun wagágudun lídaangiñe idábagu, lugúndun yaráfatimaa-jali óra lun lagíribudun Wasálbaragüle ubouágun sügú láu dán meja le wafíñerunbei luágu ugánu luáguti asálbaruni. ¹² Belújali áriebu buídu, yaráfaali larúgadun, ligía lúnti lubeí wígiruni wadúgüni cátei wuríbati le

adügúbei lábugiñe lubúriga, lun wadáürunun wadáüra-gun queísi súdaara ja lábugiñetiña larúgounga. ¹³ Eíbuga wamá queísi lubúdubu ítara queísi gürígia ja buídubaña, úouga ni cáta luágu jagáburi lun jarámudagun lueí jaríjin gürígia. Mabágarida wamá lídan bacháruaü, lúma buri lanárime fédu, ni lídan salúfuri lúma iwíyeni, ni lídan gáganiguaü lúma gimúgäü. ¹⁴ Lubáragiñe líra, rújumei Cristu guánarügü jubáragiñe lídan sun cátei, masáminara jumá lun jíchugun ugúndani lun lagúbüri ayúmajani.

14

Madímurejabá luágu bidúje lueígiñe Jesucristu

¹ Ánjein débili lubeí ában gürígia lídan laffínen, resíbi jumeí, maríñagunga ni cáta lun luágu cátei le machoúrunbei luágu. ² Queí buri, añájein derégüdati jafíñen, jarítaguatiña luágu gayára lan jeígin affíñetiña furúmieguaügü cátei áni jeréderuba jarúmañu ligíbugiñe Búngiu. Añájein jíbiri, débilitiña lídan jafíñen, meígintiña úwi. ³ Le eígiti furúmieguaügü cátei, moún lumuti únabu lan lanúgüni le meíginbalin, le gíñe májabei leígin furúmieguaügü cátei, moún lumuti gíñe ladímurejan luágu le eígibalin, lugúndun resíbi láali Búngiu gürígia ligía queísi lánigu. ⁴ ¿Cátabuñadíbugi lun badímurejan luágu gürígia le esériwidubei lun Búngiu? Ánjein erédera buídu o wuríba, Labúreme lúnbei laríjin láu líra. Áni leréderuba buídu lugúndun gabáfuti Búngiu lun leréderagüdúni buídu.

⁵ Nijánya ában jémpulu. Añájein gürígia weíríti janúgüni ában wéyu lueí ámu wéyu, añájein jíbiri, affíñetiña luágu ában lan lábu sun wéyu. Cáda ában lúnti lachoúruruni le uágubei larítagua. ⁶ Le areídubei som wéyu, ladúgüñein lun líchugun inébesi lun Búngiu. Le

eígibei furúmieguarügü cátei, leígini lun líchugun inébesi lun Búngiu, lugúndun rúti eteíngiruni lun Búngiu luágu eígini ligía. Le meíginbei úwi ladúga liloúguan lafíñen, lun líchugun inébesi lun Búngiu ladúgei, rúti gíñe eteíngiruni lun Búngiu luágu cátei le gayáraabei leígin según lafíñen.

⁷ Nariñagubalin líra lugúndun úa lan ni ában wádaangiñe abágariduti lun guánarügü, úa ni ában ouweti lun guánarügü. ⁸ Ánjawa abágarida, wabágariduña lun wadúgüni lugúndan Búngiu, ánjawa ouwe, wounweña según lugúndan Búngiu. Ítara líña lubeíti, dándu lídan ibágari queísi lídan ouweni, láni Crístu wagía. ⁹ Jiláti Crístu, ábaya labágaridun lun Wabúremebei lan, wínwañu wagía yebe, jiláñu yebe.

¹⁰ ¿Ánjein bugúya, ca uágu badímureja luágu bidúje lueígiñe Jesucrístu? ¿Ca uágu banúgei quei ni cáta? Búngiu rügüñein lun lagúseragüdün, áni sun wagía, waráramuba ligíbugiñe lun wagúserun, ¹¹ queísi taríñagun Lerérun Búngiu.

Inárüniti ítara quei gabágari nan, líña laríñagun Búngiu, luágu jájuduraguba lan sun gürígia nigíbugiñe, áni jasúbudirubadina súngubei ligíbugiñe guríriguaü.

¹² Cáda lubeíti ában wádaangiñe, lagúseruba luóúgua lúma Búngiu.

Machúgeraguagüdadeí bidúje

¹³ Ligía, moún lubeí wadímurejan jawágu wadújeñu lueígiñe Jesucrístu. Lubáragiñe líra, derébugulá jarítangun lun madúgün jumá ni cáta le gayáraati lachúgeraguagüdüni jíbiri, o láburugüdüni lan lídoun figou.

¹⁴ Subúdi numúti luágu úa lan ni cáta le leígibei gürígia lun lawíyeduni ligíbugiñe Búngiu, áni choúru numúti líra,

ROMANOS 14:15 42 ROMANOS 14:23

áu queísi affñeti luágu Jesucrístu. Láu sun líra, ánjein jarítagua lubeí ában gürígia luágu marúman lan ában cátei, marúmaanti lun, áni figoú lun lun leígini. ¹⁵ Ánjeinti bañáwuriya lafiñen bidúje láu cátei le beígibei, mámaali bagáburiduña láu ínsiñejabuni. Madúgabá lun leféridirun ában gürígia le uefigiñebey louwe Crístu, ladúgarügü beígin ítaga cátei. ¹⁶ Míchiga jumá lubeíti lúgaaru lun ladímurejoún wuríba luágu cátei le gayáraabei jadúgüni queísi affñetiña luágu Crístu. ¹⁷ Larúeijan Búngiu máma cátei luáguti le eigíbei o atúbei, luáguti ában íbágarí le lánina ísuruni, darángilaü lúma ugúndani le líchugubei Sífiri Sándu woun. ¹⁸ Le esériwiduti lun Crístu lídan igáburi le, gúndaati Búngiu láu, áni buíti giñe jarúma gürígia.

¹⁹ Ítara méme wamá lubeíti áluaja lun lídan lan darángilaü sun cátei, lun gayára lan wíderagun wámagua lun wawáanserun lídan cátei le lánina Búngiu. ²⁰ Magúrinchaguabeí luwádigimari Búngiu lídan libágarí ában gürígia láu cátei le beígibei. Inárüni luágu jarúma lan sun eíginí ligíbugiñe Búngiu, le wuríbabei, lun leigín cátei le áburugüdütiña ámu gürígia lídoun figoú. ²¹ Buíti lun meígin ban úwi, matún bínu, madügün ni cáta le achúgeraguagüdüti bidúje, o láburugüdüni lan lídoun figoú, o ledébilragüdüni lan lafiñen. ²² Afíñeni le buágubei, lúnti buágu guánarügü lan ligíbugiñe Búngiu. ¡Gúndaati gürígia le gayáraabei laríñagun luágu buídu lan cátei le ladúgübei, masándiragunga ligía lúngua láu dúru! ²³ Ánjeinti le eigíbei ában cátei láu machoúruni luágu buídu lan leígini queísi affñeti luágu Crístu, gadúnrunti ladúga leigíni, lugúndun meígin lumúti láu affñeni. Sun le wadúgübei, ánjava arítagua luágu fágua lan moun láani

wadúgüni, figoú woun.

15

Gúndaagüdabá gürígia bíledi, máma amürü guánarügü

¹ Wagía le jérebei lídan waffínen, lúnti gagúraasun wamá jabá ja louguagiñabaña affíne, lúnti warítagun luágu le buídubei joun, mámarügü luágu wíchugun ugúndani wouniwagua. ² Cáda ában wádaangiñe, lúnti lagúndaaraguagüdüni gürígia líledi láu le buídubei lun gürígia ligía, lúma láu le gayáraati lagánwoundagüdüni laffínen. ³ Ni Crístu, míchugunti ugúndani lúniwagua, lubáragiñe líra, suséreti le abúrújoubei tídan Lerérun Búngiu lun. “Núguchi, áburujati janábajan ja anábubalibu nuágun.” ⁴ Sun le aríñawagúbei tídan Lerérun Búngiu lúmagiñe binárü, lun larúfudajoún woun labúrújoua, bürúwatí meja dimúrei buri ligía lun wanúgün gurásu lúma dúgüdaguauí lídaangiñe, gayára lámuga wemenigiduntima luágu Búngiu. ⁵ Búngiu le íchugubei gurásu lúma dúgüdaguauí, íderagualaún lun jabágaridun lídan dan jáma jíbirigu, queísi ladúgüni Jesucrístu. ⁶ Ítara lúba, sun lan wagía lídan ában, láu ábanrügü umálali, wíchuguba uweíriguni lun Búngiu, le Lúguchi Wabúreme Jesucrístu.

Agáambatiña ja mámabaña juríu luágu Wasálbaragüle

⁷ Resíbigua jumá lubeíti júniwagua quei gíñe lerésibiruníwa Crístu, lun liñurúniwa líri Búngiu. ⁸ Le naríñagubei, luágu liábinbei lán meja Crístu lun lesériwidun joun juríu, lun lagúnfulirun dimúrei le íchugúbei joun binádu wagúbirigu, lun larúfudún luágu gúnfuli láani Búngiu lerérun. ⁹ Liábinbei gíñe lun jíchuguba lan ja mámabaña juríu uweíriguni lun Búngiu luágu lareídun, quei taríñaguni Lerérun Búngiu.

Ligía níchuguba lubeí uweíriguni bun jagánaguagiñe ja
mámabaña juríu,

nerémujaba gíñe luágu buweírigun.

¹⁰ Tariñajare gíñe Lerérun Búngiu.

Gúnda jumá, jugúya le mámabei juríu, úara jáma ja
lánigubaña Búngiu.

¹¹ Tariñajare gíñe.

Rújuma sun ja mámabaña juríu inébesi lun Búngiu,

adímureja jamá sun gürígia luágu luweírigun.

¹² Laríñajare gíñe Isaías tídan Lerérun Búngiu.

Liábiba ában ladúgawagun Isaí,

le lúnbei lagúmadiruniña ja mámabaña juríu.

Jagía, jeménigiduba luágu.

¹³ Búngiu, le íchugubalin eménigini woun, buíngü-
dalaún láu ugúndani lúma darángilaü lídan jafíñerun
luágu, lun buíñu jumá láu eménigini, láu lubáfu Sífiri
Sáandu.

¹⁴ Nidújeñu, choúruguatina núngua luágu buin jíña lan
láu areíduni lúma subúdi luágu wafíñen luágu Crístu,
luágu gíñe gíchigadi jumá dimúrei buíti joun jíbirigu.

¹⁵ Tídan gárada to, abúrüjaadina jun láu sun furáangu
luágu buri cátei le lun mabúlieidun jumáni. Nadúgüñein
luágu wadágimanu le rúlaalíbei Búngiu nun láu lareíni,

¹⁶ lun nesériwidun lun Jesucrístu jagánagua ja mámabaña
juríu. Seríwi le nadúgübei, napúrichijani ugánu lúmag-
iñeti Búngiu luágu Wasálbaragüle lun nanúgübaña lan
ja mámabaña juríu lun Búngiu, lun lerésibiruniña queísi
gürígia ja jarúmaaru janígí láu luwádigimaridun Sífiri
Sáandu jádan.

¹⁷ Ítara líña lubeíti, áu queísi ában afíñeti luágu Jesu-
crístu, gébunati gúnda nan lídan nesériwidun lun Búngiu,

¹⁸ luágu rügúñein buri cátei le ladúgübei Crístu guá-narügü nídaangiñe nadímureja, lun jayábin ja mámabaña juríu lun jagáambubei lan Búngiu. Yúsu láali Crístu nerérun lúma náfaagun, ¹⁹ luweírin buri seíni lúma buri miláguru le nadúgübei láu lubáfu Sífiri Sándu nídán, lun lanúgüniña ja mámabaña juríu lúmoun. Láu igáburi le, jóustagüda náali lapúrichijoún ugánu luáguti asálbaruni lídaangiñe Crístu, lúmagiñe Jerusaléngiñe darí loúbawagun Ilírico. ²⁰ Ítara líña áfaaguaadina lan lun napúrichijani ugánu luáguti Wasálbaragüle le ñí lumuti magaa-búngili lan líri Crístu. Mabúseeruntina nuwádigimaridun lun Crístu lídan fulásu le ñí lumuti chülújali lan ámu láu ugánu luágu, nubáragiñe, ²¹ lubáragiñe líra, súnwandan busén nan nagúnfuliruni dimúrei lébei le taríñagubei Lerérun Búngiu.

Ja masúbudirungiñabaña luágu, jagáambuba luágu, gunfaráanda jagíame luágu.

Jarítaguati Páblo lídin Róma

²² Ladúga nesériwiduña lan lun Crístu lídan ámu fulásu, siñágili lubeí nídin bisídaün, láu sun gíbeeli lan weíyaasu nabúseerun nadúgüni. ²³ Guetóti, quei gumúnaali lan nuwádigimari lueígiñe oúbaü le, áni quei lúmagiñe lan binárü nabúseera nídin aríjaün, ²⁴ agúrabatina násügürün bisídaün dánme le nídin Espáña. Lárigiñeme aríja náadün lan lun wagúndaaragun wámagua murúsuraü, agúrabatina lun jíderagubadina lan luágu nuweíyasun yágütoun. ²⁵ Ánjein guetó, neíbuga Jerusalén, baríüna cátei joun wadújeñu lueígiñe Jesucrístu ñi. ²⁶ Lugúndun wadújeñu ja Macedóniabaña jáma ja Acáyabaña jarítaguaaña jóundarun seínsu jádaangua lun jóunajani joun idújeñu gudémetiña ja Jerusalénbaña. ²⁷ Jarítaguaaña luágu buídu

lan lun jadúgüni cátei le, áni richátiña, lugúndun dúwei jamúti joun le tímatimaati, lugúndun ítara quei jafán-reinraguni affñetiña ja juríu jarísin le lánina siélu jáma ja mámabaña juríu, lúnti giñéti jíderaguniña affñetiña ja mámabaña juríu affñetiña ja juríu luágu jemégeirun ya ubouágu. ²⁸ Dánme lubeíti gumúnaali cátei le, derége neíme seínsu le joun, ábame nídin lun Españoun, bisída naúnme dánme le násügürün. ²⁹ Choúru numúti luágu dan lánme nachúlürün júmoun, nachúlürüba lan buin láu abíniruni lúmagiñe Crístu.

³⁰ Nidújeñu, ayúmuraguatina jun luágu jínsiñejabu lun Wabúreme Jesucrístu, lúma luágu ínsiñeni le líchugubei Sífiri Sándu woun, lun júaradun núma lídan áfaaguni, ayúmuragueina lun Búngiu nuágu. ³¹ Amúriaja jumá lúma Búngiu lun leséfurunina jaweí maffñetiña ja Judéabaña, lun gíñe buídu lan lerésibirúniwa íderawaguni le nanúgübei joun wadújeñu ja Jerusalénbaña, ³² lun gúndaabadina lan dánme le nachúlürün júmoun eméragua murúsun, ánjein ligía lubeí lugúndaabei Búngiu. ³³ Júmalá Búngiu le íchugubei darángilaü. Ítaralá.

16

Mábugaü lun cáda ában

¹ Táu gárada to, nasúbudiragüdüñoun Fébe, wadúje lueígiñe Crístu to esériwiduboun wáma tídan ligílisi to Cencréaboun, jun. ² Dánme le tachúlürün júmoun, resíbi jumoún buídu lídan líri Wabúreme, queísi lúnti lan ladügún jádan idújeñu lídan affñeni. Íderagua jumoúnme lídan furúmieguaügü cátei le temégeirun, lugúndun tugúya, sarágujaña tíderagun, íderagua táadina gíñe.

³ Mábuga níña tun Priscíla, lúma lun Aquíla ja nidújeñu lídan nesériwidun lun Jesucrístu. ⁴ Jagía, rújamuti

jabágari guánarügü lídoun lénreengúnga lun jasálbaruni nibágari, teínqui níña lubeíti joun, áni mámarügü áu, sun gíñe wadújeñu ja tílana jalgílisin ja mámbaña juríu, rújamuti jeteíngirun joun luágu líra. ⁵ Mábuga níña gíñe joun wadújeñu ja oúndaragubaña jábiñe Priscíla lúma Aquíla. Mábuga níña lun numáda Epenéto le jínsiñebei nun, le furúmiñebei afíñeruti luágu Crístu ubúругu Acáya. ⁶ Mábuga níña tun María to ñadágimeinjáruboun sarágu jagánagua, jugúya Rómana. ⁷ Mábuga níña joun nupaísanu Andrónico lúma Junías já meja níbirigubaña furísunругu, buíti jadímurejan láni Crístu apóstolugu jawágu, jagía gíñe afíñerubaña luágu Crístu nubáragiñe.

⁸ Mábuga níña lun Amplías, numáda jínsiñeti nun queísi lánigu Crístu. ⁹ Mábuga níña lun Urbáno, woúba lídan wawádigimari luágu Jesucrístu, lúma lun Estáquis, numáda le jínsiñebei nun. ¹⁰ Mábuga níña lun Apéles, le arúfuda láalibei lafíñen luágu Crístu sarágu weíyaasu, mábuga níña gíñe joun tílana lúban Aristóbulo. ¹¹ Mábuga níña lun nupaísanu Herodión lúma joun tílana lúban Narcíso ja afíñebaña luágu Wabúreme. ¹² Mábuga níña joun Trífena túma Trífosa, ja ñadágimeinbaña lídan luwádigimari Wabúreme, lúma gíñe tun wadúje Pérsida to jínsiñeboun woun, to adúgaaruboun sarágu lídan líri Crístu. ¹³ Mábuga níña lun Rúfo, wügúri le buídubei igáburi le tímatimaati ligíbugiñe Crístu, mábuga níña gíñe tun lúguchu, to gíñe ítarajaruboun quei ában úguchuru nun. ¹⁴ Mábuga níña joun Asíncrito, Flegónte, Hérmes, Patróbas, Hérmes, lúma joun wadújeñu ja jámbaña. ¹⁵ Mábuga níña gíñe lun Filólogo lúma tun Júlia, lun Neréo lúma tun lítu, lun Olímpas lúma joun sun wadújeñu luegiñe Crístu ja jámbaña.

¹⁶ Chúgua jumá júngua lídan líri Wabúreme, arú-

fuda jumámugei luágu lídaañadiwa lan ában wámagua. Mábuga jáña sun tílana lilígilisin Crístu jun.

¹⁷ Nidújeñu, ayúmuraguatina jun lun jaríjiniña cátaña lan ja afánreinraguagüdübaña gürígia, ru jagía achúgeraguágülei lun jafíñen. Múaraanti le jadúgübei lúma le arúfudajoubei jun. Díse jumá jaweí gürígia jagía, ¹⁸ lugúndun gürígia jagía, mesériwiduntiña lun Wabúreme Jesucrístu, jóungua guánarügü jesériwida. Jeyéedañati gürígia ja únabugutiña láu buri liñúlun lúma lubuídun lagaambún jerérun. ¹⁹ Subúdi jamúti sun gürígia luágu ñúdün jumá láu le lubeíbei Búngiu, ligía gúnda nubeí, buséntina gíñe lun furése jumá lun jadúgüni le buídubei, máma lun le wuríbabei. ²⁰ Búngiu le íchugubalin darángilaiü, lagáñeiragüdübadün luágu Máfia, furése. Binílaün Wabúreme Jesucrístu.

²¹ Mábuga líña Timotéo jun, le nouba lídan wadági-manu, mábuga jaña gíñe Lúcio, Jasón lúma Sosípater, ja nupaísanu, jun.

²² (Áu, Tércio, le abúrújabarun gárada to, mábuga níña gíñe jun, nidújeñu lueígiñe Wabúreme.)

²³ Mábuga líña Gáyo jun. Naganouña tídan lúban to gíñe lafúrederúboun joun sun tílana ligílisi. Mábuga líña gíñe Erásto jun, le ágüdjabalin liseínsun fulásu, lúma gíñe wadúje Cuaróto.

²⁴ Binílaün Wabúreme Jesucrístu sun jugúya. Ítaralá.

Rúwama uweíriguni lun Búngiu

²⁵ Guetóti, rúwama inébesi lun Búngiu, le gayáraabei ladúgünün lúntima derégüdagu jumá lídan jafíñen, según ugánu luáguti asálbaruni le napúrichijabei, lúma arúfudajani luágu Jesucrístu. Arámudaguati meja laráansejan

Búngiu luáguti wasálbarun lúmagiñe lubáragiñe lagúmeserun uboú, láu sun abúrüja jamá meja profétagu luágu. ²⁶ Guetó, láu lugúmadin Búngiu le wínwanbei lun sun dan, subúdigüdáwaali luágu Wasálbaragüle joun sun gürígia lun gayára lan jafñerun luágu, gagáambadi jagíame lun Búngiu.

²⁷ ¡Uweíriguni lun Búngiu le ligíarügüti, ábanrügüti, le ligíarügüti chu áu, uweíriguni lun, lídaangiñe Jesucristu, lun sun dan! Ítaralá.

Lerérún Búngiu To Lánina Iséri Darádu
New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
